

宣
統
新
疆
圖
志

新疆圖志卷九十四

奏議四

臣等 左宗棠

哈密辦事大臣裁併營伍請飭撥專款摺

覆陳借用洋款摺

會報抵蘭出塞日期摺

附陳新疆賊勢片

馳抵肅州遣軍出關摺

進攻瑪納斯大概情形片

擬緩借洋款情形摺

出關諸軍進至古城留防要隘摺

覆陳杜賊紛竄摺

官軍攻拔古牧地堅巢克復烏魯木齊迪化州大概情形摺

官軍攻拔古牧地克復烏魯木齊迪化州戰狀摺

哈密辦事大臣裁併營伍請飭撥專款摺

竊哈密巴里坤古城所駐各大臣應就現存旗營核定糧餉以缺額過多准照舊額馬步挑補足數但責其保守城池不必責以戰事脫屯丁伍籍散之歸農業經

奏准通行在案其文麟兼帶威儀馬步內步隊各營查係同治六年以後收輯關內外流亡丁口分派安西哈密塔爾納沁等處雖挂名伍籍緩急難恃所稱專餉除新疆月餉七萬兩經榮全等奏准每月由劃解烏魯木齊都統一半內分撥哈密一萬四千兩欠解雖多款尙有著其餘巴哈分成餉暨同治六年以後疊次奏提哈密專餉糧價等銀均係隨時指提非如金順明春等軍專餉由部核定每月若干分省指提專款收解短欠按月報部催提之比其哈密開屯事宜自張曜到彼由籌墊經費與文麟張曜商辦修濬水渠分段開屯漸收成效然文麟今年屯糧據報僅敷一月軍食准文麟咨糧餉兩紕請由籌撥核奏比屬其欽遵前奉

諭旨大加裁減酌留精壯數營開造花名奏咨辦理並於無可騰挪之中墊撥銀一萬兩俾濟急用嗣奉

諭旨文麟奏懇陳需餉迫切情形請飭迅速籌撥一摺哈密各營月餉積欠甚鉅情形困苦飢潰堪虞亟應籌撥餉銀以資接濟該辦事大臣已照左宗棠所咨裁汰兩營弁勇以爲撙節餉糈之策現在存營弁勇計共四千人卽著左宗棠按照楚軍章程將該軍馬步八營月餉速爲籌撥並於前次借撥一萬兩外再行撥借銀數萬兩發交文麟所派在省請餉委員星速解赴該城以濟要需毋得意存膜視欽此等因正議奏覆間適准文麟移送續裁馬步清冊到內開步隊兩營每營正勇五百名連營哨兵弁子藥公私長夫共七百八員名馬隊營以二百五十騎爲一營每營連營官弁五長夫共五百八員名又馬步小隊二百名管帶官弁五員名以上馬步通共官弁勇夫二千六百四十員名又隨營辦理各營務各項差使文武員弁一百八十餘員車駝夫丁匠作斗書跟

役四百三十餘名裁撤餘丁八百名仍就哈密沁城兩堡分爲十屯設管理屯田官役三十三員名咨請分別核奏前來較前次自奏裁減兩營外復裁汰數百名惟未據將需餉若干約定成數若遵

諭旨按軍奏定餉章核估計馬步四營又二百名一月共需正餉草乾等銀計一萬三千三百餘兩合之糧價津貼及軍需等款每月數千兩共需銀二萬兩以一年計之卽需銀二十四萬應否仰懇

天恩飭下部臣仍就原協哈密軍餉省分指定每省每年協濟若干按年按月定限解撥遇閏照加不准緩欠從前積欠哈密軍餉應否分年勻解抑或劃斷舊欠從新核撥以清起訖通由戶部奏明辦理如遇協餉遲到仍由文麟查照軍章程按月發給鹽糧乾銀公費以資點綴軍餉項積欠已至二千七百餘萬兩更何能舍己芸人爲文麟代籌挪墊惟文麟既自知餉源涸絕復行裁

減額比楚軍發餉章程臣亦未便愒置擬於該軍協餉遲到時畧與通融但未可恃以爲常耳至哈密城現分十屯自應由文麟查照臣前奏准原案按丁授地酌發牛籽收穫後繳本歸官餘糧仍照時價買供軍食官私兩益毋須另請經費其額設哈密辦事大臣經費向例每五年關銀五萬兩久已停解文麟此時兼帶馬步自可毋庸另請經費而哈密協營新募士兵八十名業由臣核准查照安西各營餉折現章權歸軍需請領該廳通判准照內地停征州縣例支給薪公統由臣軍餉項挪墊作正開銷自無須文麟籌給所有文麟兼帶馬步遵

旨裁併實數懇

飭撥有專款定限撥解各情謹會同辦新疆軍務大臣烏魯木齊都統臣金順合詞恭摺馳陳伏祈

聖鑒訓示

覆陳借用洋款摺

竊於光緒二年二月十七日承准軍機大臣字寄二月初七日奉

上諭沈葆楨等奏籌議關外餉需礙難借用洋款暨江蘇擬力籌西征協餉各摺片據稱借用洋款耗息甚多海關部庫均受其害應於各省關移緩就急並江蘇竭力籌措等語所陳亦屬實在情形西征餉事甚殷自當通盤籌畫於國計軍餉兩無妨礙方爲有濟應如何斟酌盡善之處著左宗棠妥爲籌畫迅速具奏原摺片著鈔寄左宗棠閱看沈葆楨所請將湖北湖南協濟江防銀兩移解西征糧台濟用候左宗棠覆奏到日再行降旨欽此跪誦諭旨並細閱原奏摺片具悉江蘇撫臣竭力籌措兩江督臣將兩湖協濟江防銀兩撥西征深維大局苦心體身值時艱一籌莫展徒煩遠省疆臣代紓籌策咸愧奚似豈敢乞餘不足又顧之他益增歉仄顧事有萬不得已者不敢自安緘默謹就愚見爲

皇上陳之之奏借洋款原因各省關應協款項積欠成鉅陳陳

相因馴至洋防議起照常年又減至一半以外類催罔應計無復之萬不得已而有此請非不知借用洋款非正辦也沈葆楨與臣素治其清強有執臣常自愧不如原奏義正辭嚴復舉兩湖應解江防銀兩移撥西征亦實情理兩得然其代爲臣謀究不如臣之自爲謀也姑就其論國債一說詳之泰西各國經常用度原有定數其格外之費均由其國富商酌度承認自出貲本經營由公司抽收稅課以裕國用如開礦治水諸大工作原奏所謂輕利博重利者是也下非放債上非借債不得概以國債名之間有由其官中授意興辦如英吉利開印度通緬達滇邊山路圖就近銷售鴉片則官主謀而商應募不在此例至各國用兵除報怨雪仇外均爲其國商賈爭利起見兵費例由紳士商民認定計期取償於官則爲國債非臣臆說也原奏英美有國債不失爲富強西班牙土耳其以債傾國日本蹈其覆轍而謂英美舉債於本國猶是藏富於民非西班牙等國輸息鄰封之比是矣至論各國舉債攸殊效

有異同之分尙非探原之論夫英美富強甲於海國由來已久兵費借其本國之債不待求助鄰封自然之理西班牙不善經營土耳其耽吸鴉片日本因欲去其大將軍之逼舉國以奉西人割地以給俄人出其額征爲質各國衰亡之徵由其自致若謂借本國之債者必富且強借鄰封之債者自貽困蹙而引之爲借用各國洋款之戒非定論也就日本借用洋款而言因其國有逞志朝鮮取償國債之心洋人遂以此蠱之陰爲各國外海總埠頭之計日本未嘗不知祇緣旣與定議不敢復有異同隱忍遷就勉而出此非所論於西征一局夫西征用兵以復舊疆爲義非有爭奪之心借千萬鉅款濟目前急需可免懸軍待餉十年計息所耗雖多而借本於前得以迅赴戎機事之應變者可以速辦如減撤防軍以省糜費等設新制以濬利源隨時隨處如意收束計十年中所耗之息可取償十年之中非日本之尋釁舉兵與洋人共利可比至西班牙舉債經商本奸商騙賴之類也土耳其舉債傾國本紆綏

敗家之類也烏可同年而語哉以海疆按年應協之餉了還按年應還陝甘借款本息不必得半而是大有造於塞防而無所損於洋防原奏謂洋款取償於海關海關仍待濟於各省各省僅籌協餉已催解不前令兼籌協餉之息何能如期以應查借用洋款向章海關出票定數督撫鈐印歸款此次款法自亦如此各省關印票之數原劃定各省關應協之款並非於協餉外兼籌協餉之息事理著明非可隱占其與解部之款本不相涉原奏所稱海關病部庫病者其原在各省協餉之愆期現奉

諭旨自光緒二年起如不能照原撥添撥數目解至八成以上將該藩司監督照貽誤京餉例由該部指名嚴參此後海關自可不至代人受過平心而言借用洋款實於中國有益無損泰西各國興廢存亡並非因借債與不借債之故其理易明卽以現在局勢言之非先後借用洋款則此軍不能延至今日上年李鴻章有二千萬待借之奏卽沈葆楨辦理台防亦曾借用洋款六百萬兩

嗣因倭事速定部議停止四百萬今倭事息而西事殷重理舊說似非不可應請

貞飭下兩江督臣卽代借洋欸四百萬兩迅解來甘得此款清還新借陝鄂上海各欸一百二十萬兩尙可餘二百數十萬兩暫資敷衍如各省關自本年正月起協欸能解足八成以上軍有的餉源源而來苟可設法騰挪何肯以催餉煩煩自取憎厭倘各省關未能如數解報計無復之洋欸既不能借則非息借華商巨欸不可而息借華商巨欸若不謀之兩江則又無從著想此之苦衷所不得不預爲陳明者也江蘇協欸每年除劃抵前借洋欸本息外僅應補解二十餘萬兩蘇省雖允竭力籌措爲數非多而協欸外尙有應解老湘營每月四萬五千兩一款甫解至上一年七月計截至今正已欠解六個月沈葆楨雖將湖北欠解江防之十二萬兩湖南欠解江防之八萬兩撥解西征然以之抵老湘營月餉截至今正尙欠七萬兩原奏穆圖善月餉一萬兩關內外

各軍均由酌量統收分撥意在清眉目一事權亦俾得稍資周轉耳然自統收分解之議起之軍餉正因墊解過多大受其累疊經奏明有案何能稍資周轉乎總計沿海各省關協甘之款山東爲數少而報解動浙江則更不遺餘力其欠解之最多者閩爲最粵次之粵東瑞麟故後閩自英桂內召後解款日見減少閩之積欠則已至三百餘萬矣合無仰懇

天恩飭下兩廣督廣東撫福建督撫盡力籌維務將本年應協甘餉如數迅解共支危局毋推以八成自限則猶隴餉之一大宗也拜摺卽行馬步共二十九營每營僅攜四個月鹽菜馬乾就道幸各處糧料水草均已預備師行無阻當合營起行適奉

諭旨准借洋款士氣甚奮閱沈葆楨原奏則未敢宣布也謹一併覆陳伏乞

聖鑒諭示

光緒二年二月二十一日

會報抵蘭出塞日期摺

奏爲會報抵蘭出塞日期恭摺仰乞

聖鑒事竊臣宗棠於上年十二月四日附

奏擬俟臣劉典到蘭將留防善後諸務面爲商定卽起行而西

劉典十一月二十日由湘啟行沿途風水阻滯樊城登陸入秦度
隴雨雪載途感受寒疾仍按程行走二月初八日抵蘭連日商確
軍事及善後未盡事宜均有端緒正值河冰欲泮橋難遽架遲至
二十一日臣宗棠始克率親兵十哨白馬氏練丁一營馬隊四起
登程前進所部前隊二十四營則已於正月二十八日二月初二
初八十五等日陸續由涼州拔行令至肅州取齊分起次第繼進
大約由肅州以西按台站行走中途無須停頓由巴里坤達古城
十一站應察看地形留駐數營防賊旁竄抵古城後須軍糧取齊
乃可趣戰臣宗棠所帶親兵馬步各營暫住肅州俟前路糧料運
至古城後路肅州安西哈密各有儲積乃可前進其前路進止機

宜已面授總理行營營務處西甯道劉錦棠令其相機辦理不爲
遙制俄糧之運古城者截至四月可四百八十餘萬觔僅敷金順
全軍馬步之需繼進之軍所需糧料除官私馱騾駝隻裝運軍士
自行裹帶外餘均取給哈密巴里坤哈密糧源自甘肅肅州安西
而來巴里坤糧源自歸化包頭甯夏而來遠者五千餘里近者三
千數百里截至四月巴里坤存糧可六百餘萬觔其安西哈密之
糧運至古城者可四百餘萬觔存儲待運者尙千萬觔然勞費已
不勝計矣其巴里坤有數徑可達安西不復徑由哈密已飭記名
提督徐占彪俟_臣宗棠到肅後帶所部馬部四營駐之哈密則有
張曜一軍馬步十二營宋慶所留步隊八百餘人擇要扼守以防
土魯番東犯之賊如此庶後路常通糧運不匱乃可言勁氣直達
也_臣等連日籌商關內外全局布置大概意見脗合彼此互相勗
勉冀毋負

聖明委任之意征防各軍和輯如常士氣甚奮尙堪仰慰

慈懷謹一併陳明伏乞

聖鑒訓示

光緒二十二年二月二十一日

附陳新疆賊勢片

再烏魯木齊踞逆本地土匪居多逆首白彥彪所帶陝回及甘肅從逆之回踞紅廟子古牧地瑪納斯等處而皆與南路踞逆回曾帕夏通帕夏卽敖罕部安集延回曾和碩伯克也帕夏當卽伯克轉音俄羅斯旣滅敖罕踞其塔什干都城敖罕所部安集延獨免同治四年乘回部之變入踞南路喀什噶爾及各回城於是吐魯番闢展以西土回皆附之帕夏能以詐力制其衆又從印度多購西洋鎗礮勢益猖獗陝甘竄踞之逆及本地土回均倚之爲重然不敢顯然與俄羅斯較是俄兵之強可知俄人頗言其狡悍異於諸賊以敖罕向未用西洋鎗礮安集延多洋鎗隊而帕夏又能用其衆是安集延之強亦可知官軍出塞自宜先剿北路烏魯木齊各處之賊而後加兵南路當北路進兵時安集延或悉其醜類與

陝甘竄逆及土回合勢死抗官軍當有數大惡仗如天之福事機順利白逆殲除安集延之悍賊亦多就戮由此而下兵南路其勢較易是致力於北而收功於南也若北路軍威未至而賊先圖自固不敢互相援應但作守局以老我師則曠日持久亦在意中外間議論顧謂軍臨前敵陝甘竄回必有倒戈之事臣不敢信其誠然卽令誠然白逆必遁竄入南路安集延未經重創其狡焉思逞之志不忘如其併力穩抗自可獎率師徒爲一了百了之計倘詭詞乞撫仍思踞我陝疆或兵至則逃妄擬乘間竊逞爲死灰復燃之計則新疆隱患方殷豈可不預爲之所議者但以陝甘竄回及新疆各城爲慮不復知有安集延竄踞南路之事或以爲易或以爲難或以爲事可緩圖或以爲功可速就或主撤兵節餉之議或並爲難得易失之談辯說紛紜橫議歧出揆其命意皆因裨益洋防起見豈眞由衷之談哉臣本一介書生辱蒙

兩朝殊恩高位顯爵出自

逾格鴻慈久爲平生夢想所不到豈思立功邊域覲望

恩施况

臣

年已六十有五正苦日暮途長乃不自付量妄引邊荒

艱鉅爲己任雖至愚極陋亦不出此而事顧有萬不容已者烏魯木齊各城不克無總要之處可以安兵烏魯木齊各城縱克重兵鉅餉費將安出康熙雍正

兩朝爲之肝食者準部也乾隆中準部既克續平回部始於各城分設軍府然後九邊靜謐者百數十年是則拓邊境腴疆以養兵之成效也今雖時易勢殊不必盡遵舊制而伊犁爲俄人所據喀什噶爾各城爲安集延所據事平後應如何布置尙費綢繆若此時卽便置之不問似後患環生不免日蹙百里之慮區區愚忱竊有不敢不盡者謹將新疆賊勢大概一併陳明伏祈

聖鑒訓示

光緒二年二月二十一日

軍機大臣字寄光緒二年三月初一日奉

上諭左宗棠劉典奏會報抵蘭出塞日期左宗棠新疆賊勢大概

情形請籌洋款四百萬丁日昌奏洋債不宜多借各摺片覽奏均
悉劉典現已馳抵蘭州所有關內關外各事宜左宗棠業已統籌
全局布置妥協督率馬步各營分起西進爲規復新疆各城之計
足見公忠體國力任其難該督抵肅州後應如何次第進兵之處
均著隨時相機籌辦朝廷不爲遙制所陳新疆軍情賊勢瞭如指
掌惟期節節掃盪收復烏魯木齊吐魯番以次廓清南北兩路奠
定西陲爲一勞永逸之舉後路催運糧餉軍火關係緊要劉典當
隨時籌畫以資接濟左宗棠出師塞外必須士飽馬騰方足以壯
軍威而張撻伐各營將士踴躍前驅尤深廕念各省協解西征銀
餉未能足數致有積欠口糧此次遠道進兵糧餉必須充裕左宗
棠前議借洋款一千萬兩以備應用因耗息過多現請減借用四
百萬兩係爲節省經費顧全大局起見惟現當大舉深入的發欠
餉預備行饗需款甚鉅恐不足以資周轉該督旣以肅清西路爲
已任何惜籌備鉅款俾敷應用以竟全功加恩著於戶部庫存四

成洋稅項下撥給銀二百萬兩並准其借用洋款五百萬兩各省應解西征協餉提前撥解三百萬兩以足一千萬兩之數該督得此鉅款務將新疆軍務早日戡事迅奏膚功國家經費有常似此竭力湊撥可一而不可再萬不可虛糜帑項日久無功洋款如何籌借著左宗棠自行酌度奏明辦理撥用四成洋稅二百萬兩如還解部庫著戶部籌撥歸款所借洋款著仍宗前旨在全省應協西征新餉內分年撥還各省應解西征協餉現今提前趕解三百萬兩並著戶部的量指提毋任延宕其餘應解西征協餉仍著各該將軍督撫懷遵前旨嚴飭各該藩司監督儘力報解毋得以八成自限左宗棠奏閩粵欠解較多請飭將本年應協甘款如數迅解等語著該督撫遵照辦理籌借洋款本係萬不得已之舉因西征大局所關是以允借五百萬兩俾利軍行丁日昌所陳變通西餉辦法亦有所見並先後湊齊六十萬兩匯由沈葆楨處彙解具見急公嗣後應解左宗棠協餉仍著會商文煜李鶴年源源籌辦

以應急需將此由六百里諭知左宗棠劉典文煜沈葆楨李鶴年
劉坤一翁同爵吳元炳裕祿劉秉璋楊昌濬丁日昌丁寶楨鮑源
深李慶翱譚鍾麟王文韶張兆棟並傳諭文格李文敏知之欽此
馳抵肅州遣軍出關摺

竊於二月二十一日由蘭州拜摺起行沿途整隊前進三月十
三日駐軍肅州總理行營營務三品卿銜二品頂戴法福靈阿巴
圖魯劉錦棠先率馬步全軍駐於城北記名提督新授漢中鎮總
兵譚上連領所部先進記名提督甯夏鎮總兵譚拔萃繼之記名
提督陝甘鎮總兵余虎恩又繼之四月初三日劉錦棠親率漢回
馬步各軍禡旗啟行擬抵安西後分起以次前進蓋師過哈密行
戈壁中糧糗可裹帶以趨柴薪草束可儲峙以待惟水泉缺乏雖
多方疏濬不能供千人百騎一日之需非分起續進不可也見據
譚上連稟已抵巴里坤譚拔萃已近哈密余虎恩已過安西。因
古城所收俄糧尙祇四批金順緘牘頻來需糧甚急得三百六十

萬觔不能見新 允於巴里坤取糧百萬觔哈密取糧二百六十萬觔以供軍食而古城所收俄糧四批亦概付之計新糧可資接續矣惟劉錦棠馬步二十五營所需軍食本指巴哈存糧轉運古城茲兩處已分濟金順雖餘糧尙多而一時運脚難期周轉缺乏堪虞除前雇商駝萬隻由安西哈密徑運古城外復由肅州儘官民商三項車輛裝糧料運古城以廣儲峙幸歸化包頭甯夏商駝之運巴里坤者踴躍如常存糧尙敷轉饋劉錦棠到哈密後計古城儲峙稍充卽率各營長驅大進直搗賊巢戰事當在五月閏五月之際屆時節近秋初新穀徧野有糧可因轉戰而前士氣自倍

臣與劉錦棠熟商進兵機宜以先後運速爲穩者此也幸蘭州涼甘各屬俱霑春霖肅州安西於三月二十一二等日同霑優渥農祥有兆豐稔可期如天之福關內外幸獲豐年則就近採運供支勞費亦可漸圖節省而西征大局庶幾速振矣所有分起出關事宜謹據實陳明伏祈

聖鑒訓示

光緒二十三年四月十三日

進攻瑪納斯大概情形片

再於本年三月二十日在肅州行營准金順咨稱統領吉江馬隊涼州副都統額爾慶額咨報本年正月間聞白逆有糾合瑪納斯南北兩城踞回竄擾糧運之事因與督帶定營馬隊總兵馮桂增會商振武統領參將徐學功各率所部會師於大河廠相機進取瑪納斯城以期扼險防竄籌商既定額爾慶額與馮桂增卽於正月二十七日率隊先行徐學功繼之二十八日額馮兩軍營抵大河廠因待徐軍未至遂於是夜先進二十九日寅刻徑薄瑪納斯北城馮桂增等改騎爲步由城西北兩面蹂躪登斃守城賊回二十餘名開門延納官軍城中踞賊驚起拒敵馮桂增率部巷戰額爾慶額麾軍繼進鏖戰踰時斃三百餘名並陣斃兇悍逆目翟老四咬一兩名餘賊卻聚城東隅天色已明南城踞回見北城危急連施大礮官軍少卻南城賊馬步千餘乘勢蜂擁而至北城東隅

踞賊復出死拒馮桂增縱橫馳突身負數創額爾慶額亦奮身抵敵背足受傷俱裹創力戰馮桂增復受傷墮馬賊衆猛撲昇擁入城額爾慶額憤極陷陣斃賊十餘名因弁勇傷亡已多勢不能支遂卽收隊回防徐學功於是日行踞瑪納斯城十餘里地方見事已敗亦卽撤回額軍陣亡官兵共計五十五名馮桂增所部暫飭都司馮以和接帶整理又據徐學功報戰事失利畧同惟所稱未進之先額爾慶額等與徐學功原議於正月二十九日由大河廠會師進取議定後額爾慶額馮桂增兩軍先期進取徐軍屆期進發行踞瑪納斯城十餘里地方遇兵勇紛退額爾慶額帶傷回防徐學功率所部前救護敗殘兵勇收隊回營沿途探詢額軍官兵約陣亡三十餘員名馮軍弁勇約陣亡一百六七十名額爾慶額挑帶駐防沙灣土勇約陣亡十餘名金順以徐學功救援不力先摘其翎頂額爾慶額進志過銳亦未便免議等因咨核

奏前來續接額爾慶額緘牘深以徐學功進兵遲緩爲言並稱前

報陣亡官兵五十五員名內有被甲金有一名逃回實共陣亡五十四名其馮軍陣亡弁勇據營員稟報共計一百九十一名與徐學功所報兩軍陣亡人數亦有未符 維襲攻堅城本難得手而馬隊黑夜撲城尤爲希見之事額爾慶額馮桂增久歷行間不應冒昧至此此致挫之由實因輕進貪功咎由自取徐學功行近瑪納斯地方知前敵已敗不卽麾軍馳援雖屬無可辭咎惟據彼此牘報情形而言額爾慶額馮桂增原約二十九日進攻並未明定時刻嗣兩營於先夕寅刻麾馬隊前進則非徐學功所能前知且額爾慶額於襲攻瑪納斯城賊巢事前並未咨商金順事後緘牘遲至兩月始抵肅州不但馮桂增存亡未悉卽所部金有一名敗後逃回當時亦未及詳關外軍務文報多不足憑 未敢輕率請旨現飭總理行營營務處道員劉錦棠逐細查明具覆再會金順據實馳報以昭核實謹先將大概情形附片陳明伏乞

聖鑒訓示

光緒二十二年四月十二日

擬緩借洋欸情形摺

竊臣於三月十三日馳抵肅州後十六日准兵部遞到軍機大臣字寄光緒二年三月初一日奉

上諭左宗棠出師塞外必須士飽馬騰方足以壯軍威而張撻伐各營將士踴躍前驅尤深厯念各省協解西征餉銀未能足數致有積欠口糧此次遠道進兵糧餉必須充裕左宗棠前議借洋欸一千萬兩因耗息過多現請減借用四百萬兩係爲節省經費顧全大局起見惟現當大舉深入酌發欠餉豫備行糧需款甚鉅恐不足以資周轉加恩著於戶部庫存四成洋稅項下撥給銀二百萬兩並准其借用洋款五百萬兩各省應解西征協餉提前撥解三百萬兩以足一千萬兩之數洋款如何籌借著左宗棠自行酌度奏明辦理欽此三月二十五日欽奉

寄諭部撥四成洋稅銀二百萬兩見擬分作四批由順天府接續領解交西征糧台分收轉解左宗棠軍營此項庫款該部請於西

征協餉除提前之三百萬兩及兩次所借洋款劃還本利各銀若干外所餘本屬不多若令儘數解還部庫恐於該大臣軍營餉需仍屬不敷周轉著改於去歲議撥南北洋海防經費之四成洋稅內按年著提一半將此次部撥二百萬兩陸續扣還所借洋款著左宗棠詳細核定各省協餉內某年某省應還借款若干分晰具奏各該將軍督撫卽將該省協餉解過西征糧台及歸還借款本利銀兩各數目隨時咨報戶部核查倘不能解至八成以上仍著該部嚴參懲辦欽此跪誦再四感激涕零不能自已伏維出塞之師實緣局勢所在不得不然迥非黷武窮兵侈言遠畧可比

聖明洞矚邊方久遠情形

軫念征軍積年苦況

特發德音允撥部存巨款

慈諭各營將士踴躍前驅尤深渥念而慮後減借洋款難資周轉允借洋款五百萬兩

令其自酌度辦理

慈懷之曲體邊關將卒無微不至如此何以復加又

慮部議各省提前協解三百萬兩外儘數解還庫款於軍餉需難資周轉

飭改於洋防經費四成洋稅內按年扣還紓應協各省之力不强以難贍邊遠受餉之軍不限以數

天恩高厚

聖慮精詳非但時事之幸軍之幸卽各省督海關諸臣亦無不感欣同深於欽奉

恩旨後次日大饗諸軍宣示

朝廷德意令諸將校傳諭士卒歡聲雷動僉稱誓當竭力圖報有口同聲詢諸統將從前發四箇月鹽菜馬乾銀兩尙餘若干則僅有存者比以俄糧遲到先挪此項糧價銀十二萬五千兩分給裹帶均欣然喜出望外譚拔萃余虎恩劉錦棠率各起馬步出關

時。於餞送後遣人覘之還報士飽馬騰整列齊行無落後者觀士氣之可用知

皇仁之入人者深。之請借洋欸也原因協餉積欠太鉅頻催罔應計無復之而舉債用兵本泰西各國之常不足爲異借本愈多則期限愈遠取息愈薄尤於時局相宜所以擬定千萬者計得此大宗見餉除撥還歷年本息外協餉尙多贏餘庶壹意經營事之應辦者及時舉辦尙冀得所措手以濬利源非僅恃此欸爲一歲計也所以必商之兩江者上海爲中外商賈銀洋匯萃之所商借洋款恒必由之而現任督臣原有借定未用之款重理舊說息耗不至頻增茲旣窒碍不行復奉

諭准借五百萬兩自行酌度敢不切實圖維以期周妥竊計本年應得的餉除部款二百萬兩協款提前三百萬兩外各省尙有應解八成以上餘銀以之清還陝鄂滬新借各款尙可存留四百數十萬兩計連閏十箇月內餉需得資周轉是本年不借洋款尙無

不可惟此後各省關協款衰旺未可預知而懸軍深入道遠費繁若無實餉濟接不堪設想近接上海轉運局道員胡光墉等稟稱上年花旗普魯社兩國在海島開鑛獲銀甚旺若與商借可期有成等答以現奉

恩諭西征餉事目前尙資接濟如可由陝甘總督衙門出給印票無須借重兩江海關固爲簡捷苟必須海關出給印票則浙粵或容商量惟借款不須向英商議及卽滇案速結亦不復向其商借並須預爲說明彼此成借不更關白英人惟借少則期近息重恐未能如台防十年八釐之輕耳臣之擬待來年始行議借者一則遲借一年可省一年息耗一則明年議借隔年始還一期兩次彼時前借之三百萬兩本息已悉數還清界限分明各省關協餉從後年撥還借款亦不至稍形迫促屆時當詳細指撥再候飭部議覆施行至陝甘誼均一體甘餉苦絀情形撫臣久已深悉譚鍾麟欽奉

諭旨垂詢江蘇月協陝西一萬兩能否撥歸西征卽飛緘抵陝無
論陝省如何爲難必當先其所急已緘復卽由撫臣會銜具
奏免致上煩

宸厯所有感激下懷及籌辦情形縷細陳明伏祈

聖鑒訓示施行

光緒二年四月十三日

出關諸軍進至古城留防要隘摺

竊於四月十三日馳報資遣馬步各軍分起出關後疊據總理
行營事務三品卿銜布政使銜法福陵阿巴圖魯西甯道劉錦棠
稟報分統右軍記名提督新授漢中鎮總兵譚上連甫抵巴里坤
諜報馬賊由布倫托海出紅柳峽僻逕繞過古城聞將折竄歸巢
譚上連率所部急進比調知賊騎二百餘已由南山竄向吐魯番
西去譚上連率所部扼紫荊台色畢口大石頭三箇泉等處以
護運道自率兩營進駐古城劉錦棠飭繼進馬步各軍均就哈密
取存糧分起短運踰天山以抵巴里坤由巴里坤短運抵古城限

閏五月底一併取齊候令進止自率輕騎赴濟木薩金順行營商定方畧並赴前途察度地勢以便布置屯糧護運輾轉輓事宜洞知土回馬明等結壘之處爲古牧地迤西而南數十里爲烏魯木齊紅廟子官軍必先攻古牧地撤烏垣紅廟子藩籬乃可成搗穴犂巢之舉也濟木薩卽愷安城距古城九十里由此而西七十里爲三台驛又西八十里爲滋泥泉又西九十里爲阜康縣城又七十里爲黑溝驛又數十里至古牧地再進卽可抵烏魯木齊矣濟木薩距城尙遠不能扼賊之吭劉錦棠會師進勦必先據要地爲儲糧屯師之所然後左右伸縮可以有爲阜康雖祇空城而地當賊衝從前馬賊之犯科布多聞卽由阜康駛出劉錦棠之注意於此一爲進攻古牧地一爲遏賊奔竄實非無見惟阜康駐軍僅能遮截逆賊出竄一路其西北瑪納斯出竄之路尤宜先事綢繆

密飭劉錦棠於未進阜康之先與金順圖之現按劉錦棠稟閏五月初十日由巴里坤率所部數營進古城先赴濟木薩與金順

會商一切卽馳赴三台滋泥泉阜康一帶相度布置計旬日內外所部各軍可齊抵古城當調其分起銜接而進約立秋之前乃有戰事也劉錦棠所部分紮木壘河迤東護運各營擬調赴古城遺防各壘亟宜填紮已調記名提督徐占彪率所部五營前往徐占彪自請併歸劉錦棠就近調遣已允之計此時已抵巴里坤接替延紮其木壘河迤西一百三十餘里奇台古城諸處則已咨商金順飭原防各營分段縮紮當可無虞其哈密布置原有廣東提督張曜所部十三營及宋慶留哈勇丁八百名前以安西州有通巴古路徑張曜分營設防安西茲大軍前進巴古之間有徐占彪一軍填紮以時局言宜厚哈密通吐魯番大路之防而巴古通安玉之小路若在所緩而駐肅僅親兵一營馬騎二百騎亦無可再撥者劉典與書慮肅軍之單不資分布而腹地漢回安謐分防各營尙有堪以應調者飭總兵徐萬福率所部兩營兩旅赴肅念督標兵丁久經訓練亦欲調其入營學戰以成其才除

調隨營馬步弁兵三百員名赴肅此月內外均可取齊擬俟到肅復酌增安玉防營俾張曜所部悉赴哈密以絕旁竄而備將來軍鋒之選此籌策布置大略也察看關內外征防諸軍和戢一心氣勢完固前敵軍糧長運短運均尙應手儲峙亦裕尙堪仰慰

宸懷謹據實馳陳伏乞

聖鑒訓示

光緒二年六月初三日

覆陳杜賊紛竄摺

竊臣前奉

諭旨據額勒和布托倫布先後奏報逆匪竄擾沙札蓋等處見在大軍出關該逆鋌而走險窺伺北路自在意中烏科等城境內未有重兵空虛可慮倘被其竄擾則勢成燎原聚殲不易著該大臣等揀派勁旅於北路地方擇要扼紮以杜紛竄欽此閏五月十一日欽奉

寄諭金順奏追剿北路竄匪情形並請飭烏科等城派兵扼紮要

隘英廉奏回匪竄擾塔境派隊防剿暨俄人解運軍糧被匪搶擄各摺片覽奏均悉賊匪由布倫托海竄出紅柳峽地方經官軍跟蹤追剿賊由吐魯番仍回烏魯木齊金順見派兵駐紮木壘河三箇泉等處梭巡防剿但北路沙磧遼濶無險可扼防不勝防且東路爲大軍後路糧運所必經該逆雖已歸巢難保不乘間窺伺金順仍當嚴飭派出各軍認真防探遇賊卽擊毋稍疏懈布倫托海迤西疊崙山地方竟有賊匪搶劫俄人糧石之事該處地勢以烏魯木湖烏梁海沙扎蓋爲扼要之區金順擬將塔爾巴哈臺索倫等隊扼紮烏魯木湖科布多蒙古等隊扼紮布倫托海或烏梁海適中之地烏里雅蘇臺黑龍江等隊扼紮沙扎蓋藉堵賊匪紛竄著榮全額勒和布章林多爾濟杜嘎爾托布倫保英英廉酌度情形倘能分撥官兵前往扼紮未始非先事預防之計惟各城兵勇無多防剿均屬喫緊恐一時不敷分撥兼顧爲難前月左宗棠奏資遣馬步出關當因烏科等城兵力甚單恐逆匪被剿旁竄諭令

該大臣等揀派勁旅於北路地方擇要扼紮見在烏魯木湖等處
既爲賊匪必竄之路卽著左宗棠金順妥爲籌商若各城無可分
撥之兵該大臣仍當懷遵前旨卽派勁兵前往駐紮以杜紛竄等
因欽此。維制賊之要在審賊勢察賊情而合地形之遠近衝僻
以通籌乃可策全功而免意外之變。於關外西北地形未能懸
揣不敢冒昧指陳上瀆

天聽惟前奉

諭旨揀派勁旅於北路地方擇要扼紮比已恭錄行知金順劉錦
棠熟察地形妥爲布置務期周密仰慰

宸厪一面咨委烏魯木齊領隊大臣錫綸赴沙山一帶預籌截勦
飭總兵桂錫植都司馮以和所部併歸統帶茲金順派撥吉林黑
龍江馬隊合成十騎歸錫綸統帶以資得力並飭劉錦棠挑派將
領率步隊左之見准金順咨稱調徐學功馬隊三營步隊一營歸
錫綸調遣劉錦棠進阜康大隊取齊又適奉行知閏五月十一日

欽奉

諭旨自必恪遵派撥是錫綸兵力不虞單薄也錫綸生長邊陲熟悉蒙部情形能通蒙文蒙語聞其爲人亦甚倜儻與金順榮全均稱相得近時俄糧續由沙山一帶運送一百餘萬觔卽係錫綸迎護茲令防剿竄匪更有攸宜竊維用兵宜布遠勢金順所陳請將塔爾巴哈臺索倫等隊扼烏魯木湖蒙古科布多等隊扼布倫托海或烏梁海適中之地烏里雅蘇臺黑龍江等隊扼沙扎蓋原因賊騎蹙忽特甚北路平沙廣漠防不勝防慮難一處聚旂故爲此節節邀截之計雖於烏科兵力單薄調隊維艱情形未遑計及而就事論事實有不容已者以賊情賊勢度之逆甘逆回被白彥虎迫脅出關者非盡屬其死黨不過因頻年未經重創相與安之白逆等復劫其各棄眷屬北竄遐荒似非陝甘各回所願至關外土回自戡定後訓服有年已成積弱之勢狡悍肆亂者無多白逆縱糾其北竄亦必無應之者如大軍進逼環攻諒以勦撫兼施之

意釋脅從而急渠魁解散必衆逆賊如從阜康境內竄出金順劉錦棠所部截之自有餘力如從瑪納斯竄出近則孔才各營稍遠則錫綸新統各營截之亦可不令其善脫而塔爾巴哈台後路又阻其前英廉所部雖單榮全應挑撥勁旅歸其調遣或扼之烏魯木湖或就近擇要截擊皆可確操勝算惟備禦不虞古之善教烏科等城舊爲邊城要地自古用兵西北從北路出兵無由南路者兵事未可久荒當此殘逆喘息僅存而使百密一疏亦非全策如慮兩城兵力單薄糧運維艱則

諭調精兵於科城烏城前路擇要扼防或卽由兩城領兵大員就近添調防兵嚴扼奔衝以資周防而固封守給以薪水口分俾其壹意布置務保無虞計北路兵事當可尅期告藏需增防兵爲數非多所耗無幾而大局益增穩慎矣伏懇

申諭榮全英廉額勒和布車林多爾濟杜嘎爾托倫布保英實力籌維共襄茲舉毋因惜小費而忽遠猷則誠時局之幸謹據實陳

覆伏乞

聖鑒訓示施行

光緒二年六月初三日

軍機大臣寄光緒二年六月十七日奉字

上諭左宗棠奏布置出關各軍並覆陳杜賊紛竄情形金順奏特參副都統吉爾洪額不遵節制各摺覽奏均悉劉錦棠所部見擬進紮阜康爲進攻古牧地之計其瑪納斯一帶爲賊匪出竄之路尤宜先事預防左宗棠已飭令該員前赴濟木薩與金順會商妥辦此外奇台古城及哈密等處亦經分派隊伍扼要進紮並咨委錫綸帶隊赴沙山一帶截勦布置尙屬周妥劉錦棠率所部此時已行抵古城左宗棠金順妥速會商飭令各軍相機進取次第收復各城以期早日戡事惟大軍進勦該匪鋌而走險勢必四路分竄塔爾巴哈臺烏里雅蘇臺科布多等城兵力雖屬單薄亦應聯絡聲勢妥籌防勦著榮全額勒和布車林多爾濟杜嘎爾托倫布保英桂祥英廉各就見有兵力扼紮要隘遇有賊縱竄近卽行實

力兜勦毋稍疏虞副都統吉爾洪額因病請假該員所帶之隊經金順派令沙克都林北布前往接統乃吉爾洪額抗不交代輒將沙克都林北布禁錮室中並有令衆兵向沙克都林北布索取欠餉等情似此任性妄爲不遵軍律實堪痛恨著左宗棠按照金順原奏各節認真查辦據實具奏其所統官兵卽著金順飭令迅速交出不准藉詞宕延一面先將該副都統看管聽候查辦金順原摺著鈔給左宗棠閱看將此由六百里各諭令知之欽此

官軍攻拔古牧地堅巢克復烏魯木齊迪化州大概情形摺

竊出塞諸軍次第進至古城留駐巴里坤並籌防各要隘情形

已於六月初三日詳細陳明嗣據總理行營營務三品卿銜布政使銜西甯道劉錦棠稟報六月初一日率所部馬步各營進抵濟木薩與金順商定機宜同時西進沿途各要隘均派營守之初八日金順進駐阜康縣城劉錦棠進紮城東之九營街訶知逆首白彥虎已由紅廟子移踞古牧地糾合該處回曾併力迎敵安集延

亦遣賊目率黨助戰劉錦棠以賊中正穫麥豆有糧可因雖後隊
尙未到齊然師期不宜再緩察看阜康大路至黑溝驛七十里縣
西一帶深林蔽日野潦縱橫二十里爲西樹兒頭子尙有廢渠堪
引縣西之水以供汲飲由此五十里抵黑溝驛則盡戈壁無水泉
中間惟甘泉堡一智井開濬僅供百人一日之需不能安營詢之
土人知黑溝驛之上爲黃田水盈溝澮上流卽古牧地賊已於起
築卡樹柵嚴密守護意在斷官軍汲道迫官軍由大道越戈壁五
十里而來前阻堅城人馬渴乏可乘其敝也十九日劉錦棠調集
馬步各營拔至阜康縣城西十里督飭勇丁開溝引水節節流通
引至二十里之西樹兒頭子就地築壘二十日派馬步各隊排列
甘泉堡故掘智井示行大路以懈賊黃田之防騎賊來窺旋卽退
去二十一夜三更劉錦棠潛師夜起會金順所部進襲黃田黎明
行進黃田卡柵賊始驚覺騎賊紛出遙聞古牧地附近角聲四起
劉錦棠與金順率所部先踞山崗金順飭所部由右路進劉錦棠

飭陝西鎮總兵余虎恩總兵陶鼎金率馬隊進左路之左甯夏鎮
總兵譚拔萃參將董福祥副將張俊率步隊繼之提督黃萬鵬率
旌善馬隊進左路之右漢中鎮總兵譚上連提督蕭元亨戴宏勝
譚慎典湯秀齋率步隊繼之提督譚和義唐國華率步隊擁護開
花大礮知府羅長祐直隸州知州袁堯齡提督張春發副將湯仁
和率步隊保護輜重分布已定余虎恩黃萬鵬等先率馬隊分馳
下山賊騎向前迎敵官軍奮威猛擊賊且戰且走旋復合步賊來
拒余虎恩等督馬隊張兩翼譚拔萃譚上連董福祥等率步隊由
中路衝出鏖戰數合陣斃悍賊甚多余虎恩黃萬鵬等左右包抄
而前賊遂大潰卡棚踞逆見官軍銳不可當棄輜重狂竄劉錦棠
飭馬步各隊蹣跼緊追且追且殺徑抵古牧地踞賊有縮入城者
有南向紅廟子奔竄者其右路之賊亦經金順擊敗劉錦棠見古
牧地城大而堅未可猝拔收隊還駐黃田計是役斃賊極多生擒
二十一名奪獲旂幟鎗械數十件戰馬二十八匹劉錦棠所部陣

亡弁勇十四員名受傷弁勇三十八員名此二十二日會師攻拔黃田堅卡追賊至古牧地獲勝之實在情形也據擒賊供踞黃田卡柵者陝逆白彥虎之黨踞古牧城之回酋馬明因白逆安集延曾疑其與官軍通押回南路噉頭目王治金中萬率土回堅守其與官軍接仗之黃衣騎賊則安集延及南路各纏回也二十三日劉錦棠派營分紮古牧地城正東及東北二十四日卯刻劉錦棠見有騎賊數千由紅廟而來一面告知金順準備一面飭余虎恩黃萬鵬等率馬隊馳赴山前嚴陣以待飭步營爲策應又調步隊分兩路攻南關分兩路攻山壘一面昇開花大礮安城東南礮臺轟其山壘復移轟城關牆垛多圯劉錦棠卽令譚上連袁堯齡等分途進攻以親兵徑搗山壘之前以馬隊繞出後面斷賊入城之路各將弁勇丁鼓勇齊登遂奪其壘譚上連等見山壘已得士氣愈奮皆冒鎗礮斬關而入立將城關攻破賊奔城中斬擒甚衆劉錦棠卽派各營進據關壘援賊悉力衝撲數次均經馬隊攔截金

順並派馬隊兜剿壘戰逾時燈斃黃衣賊酋羣賊氣奪敗潰而南
馬軍兩隊合追至卡子溝收隊是役除金順一軍殺賊不計外劉
錦棠所部殺斃蟲斃悍賊約五六百名生擒安集延逆賊二名南
路和闐阿克蘇纏回各三名葉爾羌纏回四名土回無數奪健馬
三十五匹洋鎗膏油鎗旗幟刀矛無算陣亡弁勇二十九員名受
傷弁勇一百五十七員名此二十四日官軍進攻古牧地奪壘奪
關並擊敗援賊大獲勝仗之實在情形也據擒賊供安集延曾調
集南路各城馬隊派頭目阿托愛管帶來此助戰官軍馬隊獲黑
馬一匹裝飾珍異卽阿逆坐馬惟阿逆下落尙不可知二十七日
劉錦棠以古牧地關壘既克輯懷城鎖圍已合各營攻具已備飭
發開花礮轟倒東北兩面城各一二丈面商金順並飭所部各營
分路急攻二十八日寅刻復轟坍城東南牆垛劉錦棠督弁丁三
面猛攻城賊拚拒屢戰兩時劉錦棠所部中軍及董字營突由東
南角一擁而入金順所部與劉錦棠所部之派攻東北各營者亦

踴躍齊登將城中悍賊五六千人一併斫殺淨盡有逸出者亦經預派各馬隊截殺無一漏網拔出難民婦女幼孩甚衆劉錦棠以古牧地既克守賊盡殲烏垣逆賊必聞風膽落乘勝直搗一鼓可下遂一面知會金順一面派隊於二十九日黎明親督向烏垣進發經過卡壘一律踏平迨抵城東見賊紛竄麾軍分途猛撲斬馘無數立將烏魯木齊迪化州城池及偽建王城同時克復馬隊蹣賊緊追至鹽池墩一帶始還探報昌吉縣踞逆業已宵遁其瑪納斯呼圖壁各城已否克復雖未得確耗然亦斷難穩踞此攻拔古牧地克復烏魯木齊迪化州城池大概情形也臣維烏魯木齊各城爲新疆關鍵屬中原多故客回構變土回隨之安集延以亡國之餘乘機竊踞南路重煩

朝廷西顧之憂蓋有年矣茲由關內籌餉集糧選將出師踰越重險會師進討甫歷四月連下堅城非荷

天恩軫恤征軍

險會師進討甫歷四月連下堅城非荷

特頒內帑各疆臣時艱同值仰體

皇仁推食解衣俾得踴躍前驅迅赴事機之會何以臻此惟餘孽猶存安集延狂寇兇饒雖熸尚未大加懲創是則區區微衷所難自釋者也所有官軍會師進剿攻拔古牧地堅巢克復烏魯木齊迪化州各城池情形先陳大概仰慰

聖懷其戰狀一切及賊踪聚散分合辦理善後獎卹員弁各事宜俟金順咨報劉錦棠續稟到營再會同金順馳

奏合併聲明伏乞

聖鑒訓示施行

光緒二十七年七月十八日

光緒二十年八月初三日內閣奉

上諭左宗棠奏官軍會剿賊匪大獲勝仗攻拔堅巢克復烏魯木齊等城大概情形一摺左宗棠督飭西甯道劉錦棠率各營會同烏魯木齊都統金順所部於本年六月間由濟木薩西進逆首白彥虎由紅廟子移踞古牧地糾合該處回酋併力迎敵安集延亦

遣頭目率黨助戰官軍會襲黃田賊卡分途進擊陣斃悍賊甚多
踞賊敗竄官軍緊蹙追殺直抵古牧地各將領鼓勇齊進遂奪其
壘立將南關攻破六月二十七日劉錦棠會商金順率所部急攻
開放大礮轟塌城垛二十八日各軍踴躍登城將城中悍賊五六
千人殲除淨盡二十九日乘勝進勦烏魯木齊踞逆經過卡壘一
律踏平該逆紛紛竄遁斬馘無數立將烏魯木齊迪化州城池克
復勦辦甚爲得手左宗棠規畫調度洞中機宜金順劉錦棠勦賊
奮勇均堪嘉尙所有一切詳細情形及應行獎卹各員卽著該大
臣等查明具奏仍著督飭各軍實力勦辦並查明逆首白彥虎等
下落毋任漏網以靖邊疆欽此

官軍攻拔古牧地克復烏魯木齊迪化州戰狀摺

竊官軍會師進剿攻拔黃田賊棚古牧地堅巢克復烏魯木齊迪
化州各城大概情形。已於七月十八日專摺馳陳茲據總理行
營營務三品卿銜布政使銜西甯道法福浚阿巴圖魯劉錦棠續

報六月二十四日攻拔古牧地關壘並擊敗援賊大捷之後金順劉錦棠策馬巡視知古牧地城賊守備甚嚴金順遂飭所部環城正西西北西南三面結壘劉錦棠環城之正北東北正東東南正南等面結壘抽派營勇於南城外晝夜修築礮台以高過城身一丈爲度其各面原有礮台均令培土鋪板以便安礮迨礮台告成布置就緒金順督所部攻西北一帶並分開花銅礮一尊置湘軍礮台二十六日劉錦棠飭甯夏鎮總兵譚拔萃率千總莊偉以開花大礮轟塌東北面城垛復用開花銅礮並劈山礮緊對缺口連轟之二十七日移開花大礮斜轟城之正東其轟塌缺口與東北相似復以開花小礮及劈山礮環攻不歇城內賊衆踞守益堅二鼓後劉錦棠傳集將領商定策畧飭譚拔萃督同提督席大成副將湯仁和率左軍三營由東北缺口進攻漢中鎮總兵譚上連督同提督蕭元亨戴宏勝率右軍三營由正東缺口進攻均各留隊以遏賊竄知府羅長祐督同副將楊金龍及莊偉率親兵移開花

大礮於正南礮台伺天色嚮明指轟南門左側並調集標針快礮鎗七響洋鎗劈山礮排列礮台左右同時轟擊提督譚慎典譚和義率中軍左四旗參將董福祥副將張俊率董字兩營各飭勇丁襄土潛伏牆壕俟大礮轟有缺口卽行攻入直隸州知州袁堯齡提督唐國華湯秀齋率中軍右三旗列隊南城左右以備策應並遇賊出竄之路陝安鎮總兵余虎恩督同總兵陶鼎金率馬隊兩營提督黃萬鵬督同千總崔偉畢大才禹中海守備禹益長馬正國率馬隊五旗提督陶生林率馬隊一營分布正南一帶山岡提督張春發陳廣發率步隊兩營分布西南一帶平川俟城賊出竄截擊布置已定劉錦棠自率老馬隊於城南山壘憑高督陣二十八日黎明開花大礮轟動南城左側子牆漸圯大礮測準連轟城身圯缺過半城頭悍賊潛伏城隈仰施鎗礮官軍標針快礮鎗七響鎗劈山礮連發子注如雨賊多死者城南壘中號鼓齊發南路攻城隊伍飛奔齊進賊猶以鎗礮憑牆抵放官軍既上缺口各以

火包向賊紛擲後隊復囊土填壕一擁而入將施放鎗礮拒賊悉數斬殺城中悍賊分扼巷口死拒譚慎典譚和義張俊董福祥等各督隊短兵相接斬馘甚衆時譚拔萃均已入城金順所部又由東北面併進合擊巷戰之賊斫殺殆盡其由缺口逸出者均經預派各馬步截殺無一漏網陝回頭目馬十娃爲禹中海素識擒而斬之其餘所斬賊目則不知誰何也劉錦棠見城賊也淨始飭所部收隊還營計是役擊斃殺斃焚斃悍賊不止五六千人生擒二百十五人拔出難民婦女幼孩甚衆奪獲賊馬二百餘匹鎗礮旂幟刀矛無數劉錦棠所部陣亡員弁勇丁一百五十八員名受傷四百五十五員名據擒賊供回酋王智卽王治及金中萬均經官兵殲斃其安集延派援兩賊目一綑塞奇一玉只把什共帶夷兵三百五十八人已於二十四日盡殲其城內夷兵除生擒外亦均於是日盡矣白逆彥虎本踞紅廟子時往來卡子溝未曾入城故得倖免此二十八日會師攻拔古牧地堅巢首要各逆擒斬淨盡

之實在情形也劉錦棠入城察看尙存火藥硝磺數千觔拾回漢文各一通閱係王治金中萬等被困求救於烏城逆首阿奇木者其批回言烏城精壯已悉數遣來現在三城防守乏人南疆之兵不能速至爾等可守則守否則退回烏城併力固守亦可阿奇木係怕夏派甘回馬人得所充之官管轄古牧地烏垣紅廟瑪納斯及僞王城回兵者所稱三城蓋指烏魯木齊迪化州及已死僞清真王妥得璘所築之王城所稱南疆則指安集延而言也劉錦棠以烏垣空虛當乘勝急攻遂一面知會金順一面派弁偵探旋據報稱卡子溝兩賊壘已空距卡子溝二十里之七道灣有賊竄走劉錦棠卽飭譚和義唐國華兩營留守古牧地城餘隊均於二十九日黎明親督進烏垣金順亦督所部繼進行近七道灣堡馬隊回報堡外尙有餘賊見官軍至飛騎而竄馬隊躡追斃賊十餘名劉錦棠卽留董福祥步隊一營守堡餘隊悉拔前進行近烏城十里地方探報三城騎賊紛竄遂催馬步急進甫抵迪化州城北見

竄賊千餘已出城里許向南奔逸劉錦棠立飭余虎恩陶生林陶鼎金率馬隊三營由左路追擊譚拔萃席大成張春發湯仁和率步隊四營繼之黃萬鵬崔偉畢大才禹益長馬正國禹中海率馬隊五旗由右路追擊譚上連蕭元亨戴宏勝陳光發率步隊四營繼之譚慎典湯秀齋張俊率步隊三營由北城衝入劉錦棠率羅長祐袁堯齡及老馬隊親兵列隊城北旋據入城各營飛報城中悍賊百餘人悉經斬殺生擒賊十三名此外未持械者悉釋勿誅劉錦棠復分隊入僞王城及烏魯木齊合金順所部將未竄零賊盡殺無遺據擒賊供二十四日古牧地關壘克復援賊敗退賊首馬人得與白彥虎等聚議以官軍銳不可當莫如先遣婦女輜重南竄留精壯駐守再候消息嗣見官軍大至遂相率逃奔訊畢斬之適追賊馬步各營收隊入城據稱分追至十餘里地方賊回頭拚拒馬隊合力猛擊斬殺甚多陶鼎金腮受矛傷裹創與余虎恩黃萬鵬等急麾馬隊追殺至城南三十里之鹽池墩因踰此而南

卽係戈壁未便深追時譚拔萃譚上連率步隊繼至遂與收隊而還是役斃賊約五六百名生擒二十六名劉錦棠所部陣亡員弁勇丁一百三十員名受傷四十七員名奪獲戰馬七十餘匹拔出城中難民老幼婦女及避匿山谷者均設法安撫派營務處委員直隸州知州袁堯齡經理其事一而商由金順暫委該員代理迪化州篆務以專責成烏城克復劉錦棠連派哨探擒獲零賊僉稱昌吉呼圖壁瑪納斯等城踞逆先後向南竄逸安集延曾怕夏遣來援賊四五千騎聞已至距烏城一百八十里之大阪地方劉錦棠擬派隊迎擊旋詢知援賊已退遂止此二十九日會師連克烏魯木齊迪化州等城追擊竄賊之詳細情形也現在新疆北路一律肅清 擬商金順錫綸布置各城堡要隘一面商辦善後事宜一面咨調張曜徐占彪會同劉錦棠進規南路并增派馬步各營及鎗隊礮隊赴前敵助剿一俟布署安畢再行馳報竊維烏魯木齊各城自同治三年逆回安明卽安得璘肇亂戕都統提督竊踞

其中逾二年自稱爲清真王逆黨馬泰馬仲馬明馬官各署僞號分踞古牧地吐魯番瑪納斯等城又六年安明噉黨與安集延戰於庫車爲安集延所敗安集延旋赴吐魯番糾安明之黨馬仲併攻安明安明乞降仍令爲清真王踞守烏城別以馬仲爲阿奇木總管各事嗣徐學功帶隊進勦陣斬馬仲其子襲阿奇木僞職與安明積不相能復糾安集延曾攻安明安明既斃馬明馬官等悉降自是安集延遂於此征收地稅令回漢雜髮易服效其舊俗皆光頂圓領以自別而烏垣各城遂淪爲異域矣安集延曾怕夏兩次與逆回博圖降安明等盡掠其遺資搜括漢回民人金帛轉輸南路實其窟穴而驅其丁壯踞守烏垣各城以爲屏蔽迨陝逆白彥虎糾陝甘悍回竄至自知勢力不敵安集延思藉爲聲援以自固凡怕夏所欲不敢違也故怕夏日富而土回日益貧比聞大軍由巴里坤古城浩蕩而來白逆亦雜髮易服竊附於安集延其結死黨與土回堅拒官軍自觀成敗伺閒脫走則又此賊之慣技也

此次兵由北路而進一在扼其紛竄以省防兵一在下兵南路防其牽綴而由關內出兵踰伊吾車師之地越天山蒲類重險與犬羊相角逐不自付兵力餉力之足與不足置成敗利鈍於不顧者蓋不得烏魯木齊無駐軍之所賊如紛竄無以制之不僅陝甘之憂卽燕晉內外蒙古將無息肩之日若停兵巴古以東瘠區兵少無以扼奔衝兵多徒以耗軍餉無論非時局所堪卽四海宴安軍儲贍裕亦斷難爲持久之計茲幸

聖模廣運

宸慮獨操樞垣計諸部

臣仰體

淵衷詳爲籌措俾行間將士得以壹意前驅旬日之間連下堅城肅伸

天討固非臣始念所及也在事尤爲出力文武各員著有微勞合無仰懇

天恩先加甄叙以昭激勸伏乞

聖鑒訓示

光緒二年八月初一日

新疆圖志卷九十五

奏議五

關防 左宗棠四

官軍布置後路進規南路摺

籌調客軍以資厚集摺

籌畫交涉事務片

會師攻克瑪納斯南城摺

覆陳移屯實邊摺

官軍三道並進會克吐魯番兩城摺

進攻達坂城連克托克遜堅巢摺

嵩武軍蜀軍會克城隘詳細情形摺

逆酋怕夏仰藥自斃摺

統籌全局摺

官軍尅期進剿應防賊蹤紛竄摺

官軍連復喀喇沙爾庫車進規阿克蘇摺

官軍布置後路進規南路摺

竊官軍會師克復各城詳細情形業於八月初一日馳陳旋據總理行營營務三品卿銜布政使銜西甯道法福凌阿巴圖魯劉錦棠稟報烏魯木齊迪化州各城克復後昌吉呼圖壁各城客土逆回及踞瑪納斯北城逆目余小虎均於六月底先後翻山鼠竄南路瑪納斯南城土回頭目墨寶財亦於七月初一日率其死黨向南竄逸餘逆猶踞城死守金順由昌吉親率各營赴瑪納督攻臣得金順函告兩城中間相聯關廂盡破擄大礮轟攻可期速克福珠哩書來亦云旦夕可望得手也劉錦棠調知各城敗竄之賊伏匿東南山谷間覘官軍動靜遂下令分路搜山七月初六日提督譚和義陶生林等率所部取道七道灣赴東山提督黃萬鵬陝安鎮總兵余虎恩甯夏鎮總兵譚拔萃漢中鎮總兵譚上連取道大小鹽池墩向東南一帶節節搜捕至柴窩堡均畧有斬獲訊據活賊供稱敗賊眷口輜重已悉數南徙壯丁均屬集柴窩堡一百二

十里達坂城其白彥虎余小虎等敗殘股匪踞南山小東溝口噉各賊赴南山大西溝水西溝板房溝一帶收秋稼備乾糧俟官軍進攻達坂城卽乘機由南山古牧地阜康擾官軍後路劉錦棠一面咨商錫綸額爾慶額及東路各防營嚴密準備一面飭余虎恩譚拔萃率所部馬步於初九日仍赴鹽池扼紮派馬隊復進柴窩堡防賊橫竄是夜劉錦棠帶馬步各營向小東溝進發初十日黎明瞥見山旁騎賊數十飛奔而西遂整隊急追行四十里抵小東溝口追斬四十餘騎生擒三賊訊據供稱賊眷先一日移進金口峽距小東溝約九十里劉錦棠率馬步緊追比抵金口峽惟見老幼婦女踉蹌奔逃而白余諸逆則已率黨遁逃托克遜安集延賊巢矣劉錦棠令各營收賊遺未獲秋糧十二日仍返烏垣因後路古城濟木薩以西三台滋泥泉阜康等境時有零騎剽掠不辨其土回與遊勇復派馬步各隊會同該處防營嚴密搜捕適聞瑪納斯南城土回仍堅踞如故官軍屢次猛攻均未得手且有傷亡金

順緘調數營助勦劉錦棠派甯夏鎮總兵譚拔萃道員羅長祐提督黃萬鵬總兵董福祥等率步隊六營馬隊五旗赴之八月十五日啟行尙未接其戰事稟報也據探安集延曾怕夏已派賊騎五千合烏垣紅廟逸去之賊踞烏垣南二百餘里之達坂城卽噶遜營以拒官軍怕夏自踞托克遜築三城爲犄角與其悍黨守之白余兩逆入托克遜怕夏待之甚倨並勒其隨行賊衆薙髮易服傍三城以居察度南路賊勢守吐魯番者拒哈密官軍守達坂者拒烏垣官軍皆所以護托克遜堅巢也而達坂托克遜尤悍賊膺聚之區賊騎皆多至數千守禦甚固○現咨廣東提督張曜率所部出武軍由哈密之西進至瞭台入吐魯番界取道七克騰木以向閭展飭提督徐占彪率所部蜀軍由巴古之間分隊搜山凡通吐魯番各徑皆遍行搜捕搜過縱火焚山杜其零星伏匿其步大隊則由木壘河節節搜捕而進木壘河地勢寬衍可容萬騎亦饒水草本通吐魯番大道雍正中岳鍾琪奏稱以重軍駐此可保必效

者也七克騰木闢展賊均設卡官軍須順道攻拔以便屯集糧餉
軍火由七克騰木西行二百餘里則吐魯番其劉錦棠由烏魯木
齊南下之軍宜先固後路計古城以西濟木薩三台滋泥泉阜康
古牧地相距五百里金順所部防兵陸續調撥前進底營寥寥劉
錦棠分駐馬步各營仍應相隨南下臣緘商劉錦棠令各防營亦
節節搜捕前進然後以金順續調錫綸馬步各營扼之重後路之
防劉錦棠馬步全軍僅二十五營既須分布後路又須留守烏垣
屯集糧餉軍火乃可進攻達坂城而進攻之軍行過小東溝口地
方有橫路通托克遜又須分管扼截抄之賊是兵力以分而愈單
也張曜徐占彪兩軍能速拔吐魯番分趨西北以攻達坂之南庶
可牽掣賊勢與劉錦棠收夾擊之效而吐魯番毗連托克遜防禦
又不可少疎臣撥副將秦玉盛馬隊一營交徐占彪撥副將武朝
聘馬隊一營交張曜並令炮隊游擊陳文英帶開花礮及仿製短
劈山開花礮助之已陸續成行矣臣念劉錦棠全軍分而見單飭

參將侯名貴所管礮隊護開花後膛大礮兩尊車架開花後膛小礮四尊又飭解後膛七響鎗三百桿勻配子藥赴烏垣續調肅州鎮總兵章洪勝總兵方友升帶所部馬隊兩營總兵桂錫楨馬隊一營均歸劉錦棠節制調遣冀可稍助軍鋒凡所添調馬步加撥軍械均令次第前進其張曜徐占彪兩軍已整齊隊伍準備啟行。以兩軍防所距吐魯番道路迂直險夷不一程途遠近攸分應各確計日期以爲啟行先後之準其師期則由劉錦棠酌定庶彼此進止合度不致先後參差協力並規乃期周妥現接劉錦棠稟報已派十一營赴瑪納斯之調其必俟北路一律肅清收隊回烏乃能下兵南路師期固未可由。預定也至南路今歲旱蝗爲災收成歉薄官軍轉戰而前恐未能因糧於賊自不得不預爲廣籌採運以赴戎機現飭古城採新糧三萬石備運烏魯木齊巴里坤採新糧七千石合歸包甯夏已採陳糧共二萬餘石備供徐占彪一軍及防營之用哈密無糧可採由肅州玉門敦煌採運新糧接

濟約可二萬石備供張曜一軍之需徐占彪西行後以總兵徐萬福三營提督范銘一營填防張曜西行後以總兵劉鳳清豫軍八百人移駐七克騰木防護運道哈密之防已咨辦事大臣明春就近辦理明春肯顧大局所部兵勇自簡練後均精實可用與張曜極爲聯絡差爲慰幸所有布置情形謹據實馳陳伏

乞聖鑒訓示施行

光緒二年九月十七日

籌調客軍以資厚集摺

竊

臣

與金順會師西征幸仗

皇威速勘北路應卽下兵南路規復舊疆南路自乾隆二十四年平定後建城凡八曰喀什噶爾曰英吉莎爾曰葉爾羌曰和闐曰阿克蘇曰烏什曰庫車曰喀喇沙爾世呼爲南八城而吐魯番別爲一部不在八城之列以其地在天山之南爲南八城門戶官吏兵民商賈赴回疆者必取道於此故志西域者附列之由吐魯番而西歷喀喇沙爾庫車阿克蘇葉爾羌英吉莎爾以抵喀什噶爾

計四十九台爲程四千一百餘里較之烏魯木齊至伊犁一千三百餘里程途遠逾三倍茲擬以劉錦棠全軍自北而南張曜徐占彪自東而西以規南路馬步各共四十餘營兵力不爲不厚然大軍前進不特後路根本之地兵力宜增卽餉糧軍火均宜層疊設局以便取用是監護不可無軍也前敵攻克城堡必須留營駐以資撫輯是留後不可無軍也師行日遠留防之兵日增進戰之兵日減勢有固然況轉戰數千里士卒之傷亡疾病又在所不免倘額數有缺則士氣易墮歷觀軍興以來始稱精軍者末路或難復振半由乎此又查南路地勢東南長而西北狹由吐魯番達坂城西至阿克蘇尙可一路隨行無取分道並進一至阿克蘇則局勢寬濶中路一千四百里抵葉爾羌又三百六十里抵英吉沙爾又二百里抵喀什噶爾而阿克蘇之北切近伊犁葉爾羌之東南又遙與和闐相接均須分派大支扼其總要然後直搗中堅可以迅圖成役矣溯查道光年間張格爾之變僅踞南路西四城故長齡

楊遇春兵由烏魯木齊托克遜以進其時長清先扼阿克蘇憑河擊退逆衆扼守阿克蘇然後東四城無敢蠢動而長齡楊遇春乃得據無賊之地以擊賊餉豐運速卒成底定之功此次兵由烏魯木齊進局勢依然而吐魯番達坂城托克遜皆爲賊踞前途二千餘里皆爲賊守其致力難易固已判然而餉之絀兵之少又不如當時遠甚與其徘徊中道始請濟師正恐曠日需時事有不可測者臣因此躊躇再四實不得不預擬增兵伏查現駐包頭之統領卓勝金軍頭品頂戴記名提督鏗僧額巴圖魯金運昌前在甘肅甯靈一帶會剿所部淮北勇丁好勇尙氣甚耐勞苦金運昌整理數年逾就馴順近自黃甫川移紮包頭軍民相安頗得時譽臣自移駐肅州金運昌屢以在防無事堅請隨征臣時正以採運維艱難議增竈置之而金運昌西征之志益決所部各營官共相懇恣衆志相同聞其軍馬步五千有奇尙稱精實餉事每月三萬數千兩皖晉各任其半已有成說矣竊維北路解嚴山西包頭防軍本

可議撤而金運昌全軍西上尤與遠防不如近勦之說相符金運昌前在金積堡與金順劉錦棠共事一方彼此尙稱孚洽今調其西征既期與劉錦棠同心又適符金運昌本願合之兩美於時局實屬相宜已兩商山西撫鮑源深請其酌度資遣合無仰懇天恩飭下該撫迅卽轉飭金運昌乘秋末冬初迅速開拔西來歸劉錦棠調遣庶劉錦棠中路之軍得此後勁可以壹意馳驅而將來克復各城有移駐之軍更番迭進前敵兵力常足免滯戎機遇有必須分支防勦之時亦可不虞竭蹶矣至金運昌西來距皖愈遠每月半餉似難再由皖省解濟應由鮑源深與分任其半俾該軍餉事得歸有著其軍糧別由津貼以昭公允應否如斯伏祈

聖鑒訓示施行

光緒二十九年九月十七日

籌畫交涉事務片

再新疆與俄境毗連疆場之事一彼一此現當邊務交涉議論方

滋不獨措置乖方遇事動多妨礙卽語言交際偶爾失當亦足啟猜嫌爭執之萌臣奉

恩命督辦新疆軍務身在事中邊防利害之分百年安危之計既不敢不引爲己任當先權其輕重緩急審機宜以泛應合局勢以通籌庶期久遠相安詐虞可泯察看俄國情形雖權出一尊而事多分屬其來中國者暫雖馴謹有加似無尋衅生端之意然不慎之於始固有難策其終者現在邊方將軍都統各大臣除金順外臣多未曾謀面一切因應之宜有緘牘所不能詳者亦有未可形諸緘牘者相距過遠並有各處業已見之行事而臣猶無所聞者事關中外交涉誠慮議論分歧無以示遠人而昭畫一合無仰懇天恩飭下將軍都統各大臣於俄人交涉事件除現行事宜本有定章應各照常辦理此外遇俄事交涉新疆者應咨臣定見主辦不必先與商議致遠人無所適從庶期徑路絕而軌轍可尋論說少而爭辯自息似亦省心省事之一道也應否如斯伏乞

聖鑒訓示施行

光緒二年九月十七日

會師攻克瑪納斯南城摺

竊官軍會師攻克瑪納斯南城大概情形業經_臣金順具摺馳報
嗣_臣宗棠接准_臣金順咨會七月十五日率所部馬步各隊馳抵
瑪納斯南城飭統領禮字營提督劉宏發紮南城正東親兵營總
兵張大發紮城東北統領英字營副將方春發紮城東南與統領
振武營副將徐學功統帶馬隊廣州副都統福珠哩聯絡一氣城
西則令健銳營管官和振興駐紮_臣金順率親軍步隊管官參將
余致和與統帶定西營提督孔才分紮城北令吉江馬隊翼長巴
里坤領隊大臣沙克都林札布爲游擊之師分布既定_臣金順於
二十日親率總兵鄧增都司張玉林以後膛開花大礮轟城東北
角樓橫榻丈餘劉宏發方春發趁勢移卡逼紮城根_臣金順與烏
魯木齊領隊錫綸麾隊於缺口直上賊乘高死抗礮石如雨總兵
李大洪熊佑林參將陸輝先冒鎗石槍登均被子中傷登時殞命

方春發張玉林憤急猛撲均帶鎗傷張大發余致和率隊繼進更番仰攻緣城頭褊窄難於施展未能得手計是役鎗斃礮斃之賊約四百餘名官軍陣亡亦一百餘名二十六日統帶軍勝營提督馬玉崐遵金順檄調率隊抵瑪紮營城北八月初二日馬玉崐率隊潛登西北角樓斬守賊十餘人因羣賊譁覺拚死抗拒旋即收隊初三夜四鼓金順親督馬玉崐麾軍攀堞而上奪西北角樓賊負隅死鬪馬玉崐麾壯士連撲數次斃賊甚多適樓中賊儲火藥爲礮火引著橫桶倒塌勇丁被壓傷者十餘名馬玉崐亦被石傷副將銜游擊胡輝羣冒火衝殺被鎗子中傷殞命余致和麾隊直前面帶石傷猶裹創血戰劉宏發趕於西北角缺口搶築三卡高出城頭卯刻忽南風大作火焰蔽空遂卽收隊計是日斃賊約三百餘名官軍傷亡亦二百餘名嗣是城賊守備愈嚴晚間以繩繫柴草灌油燃燒光如白晝各面缺口均以蘆蓆裹土填砌沿城屋頂俱築垛口排設油鎗爲死守計孔才方春發復分軍於關

廂內添築堅卡十一日調知賊將出竄飭馬步各營嚴備劉宏發與營官劉占魁李大全率隊越卡截擊殺賊數十名劉宏發左手中指被飛子擊斷馬玉崑督隊繼進搶奪城樓斃賊多名賊復踞短垣密排父子鎗伺官軍上城連環施放相持既久官軍傷亡者七十餘名十四日飭鄧增三等侍衛雙全以後膛開花大礮轟城西南兩面十五日飭馬玉崑仍於日夕率隊向西北角缺口搶登劉宏發率隊繼之孔才方春發兩軍由北門礮樓分東西攻擊和振興張長安攻西門礮樓張大發張志德余致和攻東北角樓徐學功劉春元攻東南角樓屆時金順憑高調度飭營務處委員知縣長庚員外郎周先檀佐領恩澤光祿寺署正余應鈞分而督攻各軍或肉薄而登或緣梯猱上斃悍賊多名西城門樓賊蜂出官軍猛進賊既敗復又回撲如是者十數次定西營營官總兵張大發杜生萬緣城直上均被鎗傷斃命總兵銜副將司世道把總邵芝游擊楊占魁甫上城頭或中鎗傷或被矛刺皆逾時而殞

計是役斃賊約七百餘名官軍陣亡二百餘名十七日總統湘軍西甯道劉錦棠派湘軍營務處道員羅長祐統領湘左軍甯夏鎮總兵譚拔萃統領旌善馬隊提督黃萬鵬統領董字營總兵董福祥各率所部馳抵瑪納斯助勦當令紮營城南及西隅高築礮台並與_臣金順所部分段修掘長壕二十六日工竣適署伊犁將軍_臣榮全抵瑪會勦二十九夜飭方春發由關廂內掘成地道九月初一日午刻舉發轟塌城身二丈餘方春發麾隊從缺口入賊憑城內短垣密施鎗礮牆上磚石紛飛未能搶進湘軍譚拔萃等同時由南面進攻亦因城頭賊衆密布無隙可乘開放大礮數十子飛入城中旋即收隊訊據難民供稱賊中僞元帥韓刑臆已被官軍礮斃初二日早_臣金順所部與湘軍仍由缺口進攻賊預豎木柵加裹濕毡以擋鎗礮旌善旗官都司崔偉督隊猛攻手刃數賊臂中矢傷拔矢疾戰賊拚死抗拒遂仍收隊回營計是役官軍陣亡勇丁十九名受傷弁勇九十五名十二夜方春發復於關廂

內掘成地道湘軍營務處羅長祐及譚拔萃董福祥等仍由缺口進攻。金順與榮全親督方春發馬玉崑各軍由北城樓進攻天色向明地雷舉發轟塌城身兩丈餘各壯士奮勇搶登斃賊無算忽南風大作烟塵障天咫尺莫辨乘勢猛撲提督楊必耀持刀督戰被鎗子中傷殞命孔才舉旗繼進亦被鎗傷計是役官軍傷亡百九十餘名十六十七等日賊乘夜越壕經官軍鎗礮擊走旋又復來湘軍營官提督湯秀齋停止更鼓飭守壕弁丁靜伏壕邊并備繩索鐵鈎密排鎗礮待之夜深賊果復至鎗礮排擊斃賊頗多有三賊墮入壕溝官軍用細繫鈎引之而上據供均係西河營賊黨原籍或西甯或河州因城中糧盡無路可竄逆首韓刑臆既斃海晏接充頭目遣令偵探虛實以便乘間竄走訊畢斬之十九夜三鼓海晏赴徐學功營乞撫稟。金順示諭呈繳馬械細獻各逆首然後造餘衆名冊聽候點驗分別辦理海晏願卽遵辦二十一日平明賊衆二三千人突出西門老幼婦女居中悍黨持鎗械排

隊夾護_臣金順知其有詐飭所部各營列隊城北湘軍列隊城南
皆嚴陣以待別撥馬隊分布隘口以防竄逸一面令徐學功向前
開導諭令拋棄鎗械仍准免死僞元帥何碌忽開放洋礮賊衆撲
壕徐學功立麾部卒直前擒何碌斬於陣前各賊目及悍黨棄眷
猛撲譚拔萃董福祥等督隊奮擊_臣金順所部由北面截殺而來
賊衆左衝右突斃者大半僞元帥黑峻見勢不支以洋鎗自斃其
逸出之賊經_臣金順所部與湘軍馬隊及榮全額爾慶額所派八
隊分途追斬無遺城中匿賊經步隊一律搜斬老幼婦女悉釋勿
誅湘軍營官湯秀齋生擒僞帥馬有財與_臣金順所部生擒僞帥
海晏王奇玉馬受等概由_臣金順會同榮全提訊極刑處死其韓
刑臆黑峻等尸於克城後與肇亂之僞清真王安得磷尸骸一併
搜掘戮以示衆此二十一日官軍會師克復瑪納斯城擒斬首逆
殲除悍黨之實在情形也_臣宗棠續接總理行營營務處西甯道
劉錦棠稟報湘軍戰狀核與_臣金順咨報各情相符竊維新疆北

路烏垣迪化等城克復後陝回白逆等與昌吉呼圖壁瑪納斯北城距逆先後向南竄逸惟瑪納斯南城賊黨恃其城小而堅負隅死守官軍會師圍攻計兩月餘傷亡精銳甚多幸賴

皇上威福將士一心俾積年悍賊悉數殲除在事諸軍功績卓著合無仰懇

天恩先加甄別以昭激勸所有死事諸員均係血戰捐軀深堪憫惻應請

旨飭部各照官階從優議卹餘俟查明彙奏所有官軍會師攻克瑪納斯南城戰狀詳細情形謹合詞恭摺具奏伏乞

聖鑒訓示施行

光緒二十一年十一月十一日

覆陳移屯實邊摺

竊臣欽奉寄諭翰林院侍講張佩綸奏請抽調旗丁屯田新疆一摺據稱烏魯木齊等處亟應興辦屯田以固邊防及三便三利各情形是否可行并如何辦理之處著左宗棠通盤籌畫妥議具奏

原摺著鈔寄閱看欽此跪聆之餘敬仰我

皇上因時損益執兩用中至意咸服莫名比將張佩綸原奏詳加閱看並酌度事宜求可見之施行要諸永久者謹畧陳之以備聖明採擇竊維張佩綸原奏雖本開屯實邊立言而實則爲八旗生計愈艱亟籌因時制宜起見謹按八旗生齒日繁甲分有定國家以有定之錢糧養無限之丁口勢必有時而窮從前舒赫德孫嘉淦富俊英和諸臣先後條陳及之老成深謀遠慮固已預爲綢繆而究無成效可觀中外臣工且以窒礙多端人情不便爲慮難見諸施行者非無故也八旗官兵係出國初勦裔環衛

京師體制餉稍較綠營爲優而營運資生之策則較綠營爲絀綠營兵丁餉糧雖薄應名差操之暇可傭雇謀食手藝營生辭糧退休尙能自食其力八旗之聰明俊達者爲士勇敢強壯者爲兵惟在致身仕途博廉俸爲仰事俯畜之計無官祿者或傳習經蒙教練弓馬以其所能食於人已耳然不習行商服賈之業不知服田

力穡之勞不諳匠作工師之技於世之所謂四民者僅可名之爲士而農與工商無與焉日荒於嬉惟慢游自便望其食力行身俯仰足給豈可得哉又况逸豫之久由昏惰而長惡緣才者浸成廢才愚者或流於匪僻不僅飢渴之足爲心害也於是懷久遠之慮者急思有以拯之而移屯實邊諸議以起然事終多窒礙人情未免疑沮者約有數端八旗子弟扈從入關除駐防各省外均萃居都中例禁無故遠出近雖允其游宦四方隨在隸籍而或以選補升轉之遲速考試錄取之難易京旗視外省爲優未肯舍之遠去一也都居既久墳墓廬舍在焉賴祭產薄田住宅以給餽粥而蔽風雨一旦捐棄便致茫然二也少小卽無執業口分而外不名一錢今既離故居而適新土舉目無依縱口分照常支給設有窘苦誰與賙恤設有緩急誰與通融三也四民之業惟農最多亦惟農民最爲勞苦大凡以農世其家者子弟自成童後責其牧牛拾糞成人以後習鋤耨耕穫牽車扶犁之事故童而習之壯而稱良老

以傳家也八旗官兵平時未親耒耜未知種植之宜未習農家諸務驟驅之隴畝責以爲農之效正恐耕也而餒在其中重煩籌濟四也此窒礙疑沮之見於旗籍者也外省民事均責成各廳州縣監之以道府董之以兩司而督撫總其成今以旗員領旗兵雜民耕作兵與民不能耦居無猜官與民難言同舟共濟調停之術偶乖則箕帚鋤耰動成嫌隙錢穀交涉易啟猜疑誠恐於八旗生計無補而各省地方有司徒增煩累移屯之難一也移旗籍而興屯事遷徙路費及到地修造廬舍製辦耕具採購牛籽糧料一切需費甚繁邇值部庫空虛洋防塞防待用孔急且鉅更增此款時絀舉贏中外無從設措移屯之難二也此窒礙疑沮之見於官私者也竊惟張佩綸原奏移屯實邊諸策爲國家節經費爲八旗裕生計爲邊圉固封守洵爲濟時要務終難廢格不行部臣疆吏詎在奉公豈宜苟且目前置遠猷於不顧如果盡心協力黽勉圖維行之以漸持之以恒亦未有爲其事無其功者八旗世居都下本取

居重馭輕之義今議散之西陲移腹心之寄置諸股肱於初制似有未協新疆距京師萬里而遙遷移需費甚鉅創行之始百務艱難到地興屯數年之間耕穫未能遽觀成效之度隴也首以屯田爲務師行所至相度形勢於總要之處安設營卡附近營卡各處戰事餘閒卽釋刀仗事鋤犁樹藝五穀餘種蔬菜農功餘閒則廣開溝洫興水利以爲永利築寨以業遺民給耕具籽種以賙貧苦官道兩旁種榆柳垂楊以蔭行旅自以下至營哨各官於駐營之地日巡行視以勞來而勸勉之時逾八九年流亡漸復客作漸集所有兵屯之地盡付之民緩催科而急儲峙自涇州以抵嘉峪大道兩旁各廳州縣附近地方居然井竈相望而鄉野則尙未能遽復舊觀蓋隴上本土曠人稀邊塞又多沙石不毛之地也所以多費時日稍著薄效者由家世寒素耕讀相承少小從事隴畝於北農南農諸書惟喜研求躬驗而有得所部楚軍向皆用田家不收游手其將領又多由傭耕作苦而來故以其所習課其所

能不煩教督而自勵至所屬蜀豫淮各軍則固未能一律繩之若以八旗不土不農之子弟散之邊陲驅之隴畝竊慮於八旗生計無所裨益而於國計邊儲則又有所損。固不敢以爲然再四思維若本張佩綸之意而舉行畿輔水利不但無其損且有其益請得而畢陳之直隸水利自虞集始徐貞明潞水客談言之至爲詳盡明代或作或輟迄鮮成功

國朝畿輔水利四案如怡賢親王之苦心經畫固已功在民生而誦其遺烈者惟廣平府屬磁州溝洫依然歲獲豐稔餘則舊蹟湮沒難以覆按矣論者謂當時議興水利爲種杭稻計壯農方以體塗足爲苦又以稻非食用所需銷售不若麥豆雜糧之廣輿情不以爲便故法良意美終扞格而不行若專行溝洫之政聽民自種麥豆雜糧則因所利而利之其補潤澤而大豐美傳之久遠者當不僅磁州已也今直隸旱澇頻仍水利之興修宜亟八旗子弟雖難驟卽田功但令其親畚鍤開濬溝洫當不以爲苦且散布於

畿輔之間工作餘間仍可演習武藝有事一呼卽應於居重馭輕之義更有攸宜而操作既勤執業專而筋力健新復曩昔敦龐純固之風無難異特頗收之儔或可仍於禁旅中求之矣其天姿穎悟能讀書者聽其照舊應試捐納官職者隨時分發各省試用較見行事例而又寬之其次發赴各機器局學習製造增益其所不能上者可望一時專門名家之選下者執藝事以食於人不至悠忽無成坐費五穀是爲八旗籌生計之所從出於士之外增農與工兩途生計固可裕也直隸郡縣均畿輔近地遷移之費無多旗兵每月餉糧應卽由神機營直隸總督分給其由神機營派出者神機營各以其應得口分照舊開放由八旗派出者直隸總督酌提三口釐稅及酌撤客軍騰出之餉照神機營之餉章一律開放神機營與八旗旣各撥官兵移屯直隸先興水利該兵官等每月應劃留若干爲贍養家口之需若干爲本身赴工食用衣服之費應由神機營八旗傳詢明白酌定以歸劃一其人數多寡神機營

與八旗約畧相等間起赴工到工則專由直隸總督遴派官委管束分段課功獎勤責惰與齊民等神機營與八旗都統不復過問庶幾心志定而工作勤自有成效可期也迨直隸水利漸興八旗子弟漸習勞苦工作風氣漸開責其長爲農夫亦將安之若素直隸直東荒隙地畝固可就近安插作爲世業卽山西陝西甘肅迤北地方水草豐美可耕可牧之區亦可議漸次移屯矣至新疆土曠人稀地多饒沃張佩綸原奏尙有引徵未及者臣前聞故雲貴總督林則徐當遣戍時大興伊拉里克水利前伊犁將軍曾奏請加新賦二十萬兩有奇惜其取之太多今畫其地在吐魯番托克遜之間土名亦拉里水田甚多已屬劉錦棠張曜訪察其詳具報大抵東自木壘河起逾古城濟木薩而西三台滋泥泉阜康抵迪化州昌吉綏來再西至伊犁壤地肥潤種一石可獲數十石較之巴里坤哈密各城磽瘠薄收奚翅數倍方今新疆北路除伊犁外已一律肅清漢回土著子遺僅存屯務難以復舊誠移八旗丁壯

屯於新疆事之便利勢之可乘無踰於此者特慮以未習農務之人驟處之艱難新復邊遠闊絕之地於生計未能裕於

國計未能節而邊防亦未能藉以爲重不但勞費可惜已也若先修直隸水利徐議移屯新疆似於事體尙無窒礙於人情亦免疑沮

諭旨飭 通盤籌畫敢不披瀝愚忱一敬陳之可否

飭下神機營王大臣八旗都統會同戶部廣諮博訪定議具奏以期妥慎伏乞

皇太后

皇上聖鑑訓示施行

光緒三年三月二十九日

官軍三道並進會克吐魯番兩城摺

竊自烏魯木齊迪化州兩城俱下卽擬乘勝進規南疆因會攻瑪納斯城凱旋收隊大雪封山未能急進改以今年春融爲師期進兵次第一遵原議總理營務三品卿銜布政使銜西甯兵備道騎

都尉世職法福靈阿巴圖魯劉錦棠於三月朔由烏魯木齊踰嶺而南先攻達坂賊巢分軍會攻吐魯番記名提督雲騎尉世職哈西巴巴圖魯徐占彪由穆家地溝西南進入山排搜與嵩武軍分統記名提督博奇巴圖魯孫金彪會師鹽池先攻七克騰木接攻闢展分下諸城壘以攻吐魯番總統嵩武軍廣東陸路提督騎都尉世職加一級雲騎尉世職霍欽巴圖魯張曜由哈密西進以五營交孫金彪進駐東西兩鹽池親率大隊繼進疊據張曜徐占彪馳報徐占彪會商孫金彪以七克騰木地方爲吐魯番門戶築有堅壘賊所必爭應乘其不備迅圖拔取三月初五日徐占彪飭提督何玉超宋賢聲黃祖福率馬步三營度戈壁前進初六日夜抵離七克騰木二十里之張家卡賊壘更鼓懈弛何玉超等卽飭步隊勇丁由壘北爬入內外號鼓齊發賊始驚起黑夜倉皇奔逃馬隊邀截於外殺賊頗多初七日何玉超等率隊進攻七克騰木初八日徐占彪督後隊至晡時分三路進攻徐占彪率隊齊至四路

猛撲呼聲震天號鼓雷動賊奪門而出徐占彪所部鎗斃紅衣賊目一名羣賊膽落無心戀戰向闕展狂奔徐占彪孫金彪督隊急追沿途斃賊約百餘名生擒五名奪獲旗幟鎗械數十件馬十三匹初九日乘勝進攻闕展甫至城邊賊望風西遁兩軍蹣跚斃賊三百餘名生擒三十餘名孫金彪所部擒安集延賊二十五名內有賊目一名才米邪斯均訊明斬之奪獲鎗械百餘件騾馬二十四頭此三月初六初八初九日連克賊壘收復闕城獲勝之情形也訊據賊供安集延頭目調闕展一帶賊衆踞六古慶勝金台等處俟官軍前進供吐魯番守賊與官軍拚死一戰等語徐占彪孫金彪會商率隊分路前進十二日徐占彪行抵魯克沁城賊見官軍至出城迎戰揮馬隊衝之賊稍卻步隊繼進鎗轟矛刺賊不能支向西遁去孫金彪至連木沁台壘賊紛紛出竄擒斬數十踞踪緊追至勝金台該處新築土城一座踞賊數百齊出抗拒孫金彪率馬隊步隊奮衝擊斃賊甚衆生擒數十名內安集延二十

三名奪獲鎗械數十件兩軍仍會合於哈拉和卓城東守賊倉皇出奔追斬頗衆十三日會師前進行至距吐魯番十里守卡賊併東路敗竄之賊列陣抗拒徐占彪從左路進孫金彪從右路進步隊大呼突陣鎗矛并舉賊殊死鬪乃麾馬隊分兩旁抄襲賊陣始亂紛紛潰竄兩軍緊追至城邊賊傾巢出拒敗賊復回戈博鬪正酣戰間道員羅長祐分領湘軍馬隊倏自北路馳至賊益駭愕不知所爲三軍合勢夾攻斃賊無算敗賊向西路狂奔各軍緊追數十里沿途擒斬亦復不少怕夏所立阿奇木僞官馬人得乞降軍前孫金彪受之送羅長祐訊明處置卽各收隊分駐吐魯番兩城本地蹙回萬餘跪地乞命羅長祐徐占彪孫金彪逐加撫慰令各復業此三月十二二十三等日攻拔魯克沁城連木沁台勝金台哈拉和卓城會克吐魯番滿漢兩城之大概情形也劉錦棠三月初一日由烏魯木齊率馬步十九營踰嶺而南初三日進攻達坂城卽噶遜營乘賊不覺已合長圍分五營交羅長祐帶赴吐魯番會

勦其達坂城戰狀尙未據稟報前來緣緘牘由烏垣驛站馳遞較由吐魯番遞肅遠踰千里不能速也謹將會克吐魯番大概情形先行馳報其達坂城戰事及會克吐魯番詳細情形容俟劉錦棠稟報到日再行具

奏合併聲明謹據實馳陳伏乞

聖鑒訓示施行

光緒三十三年三月二十九日

進攻達坂城連克托克遜堅巢摺

竊官軍會克吐魯番兩城大概情形已於三月二十九日專摺馳陳惟時劉錦棠攻克達坂城托克遜捷報由烏垣古城驛站遞肅較由吐魯番取道哈密遞肅遠輸千餘里未能速到茲據三品卿銜布政使銜西甯道騎都尉世職法福靈阿巴圖魯劉錦棠三月十三日由達坂城馳報三月初一日親率馬步各營旗及開花礮隊由烏魯木齊踰嶺而南初三日抵柴窩鋪派隊修壘留營駐紮偵知達坂踞賊堅守如故遂於是日黃昏派陝安鎮總兵余虎恩

提督陶生林黃萬鵬參將崔偉畢大才禹益長禹中海游擊李金良夏辛酉各率馬隊漢中鎮總兵譚上連提督戴宏勝陳廣發譚和義各率所隊於是夜初鼓銜枚疾走乘賊不覺逕趨達坂期以五鼓會集城下立合鎖圍杜賊竄逸夜間我軍前進中途斬賊探十騎近城十餘里又擒兩賊一安集延兵一本地纏頭回訊供達坂城之賊尙謂官軍在紅廟未來也近城一派草湖淤泥深及馬腹蓋賊新引湖水圖阻官軍者余虎恩陶生林夏辛酉率馬隊掠過深淖列城左山岡譚上連譚和義戴宏勝陳廣發率步隊列城後山河黃萬鵬崔偉畢大才馬正國等各以馬隊與余虎恩馬隊聯接成陣禹中海禹益長李金良等各以馬隊與譚和義聯接成陣天明霧收賊在城頭瞥見官軍環列圓陣勻布整齊擊洋鎗指擊並發開花大礮我軍傷亡十餘人屹立如故自卯至午城中鎗礮不歇劉錦棠策馬周覽城壕誘賊出擊所至賊鎗密注子下如雨從騎有傷者劉錦棠坐騎亦中子立斃易馬而前飭各營嚴防

衝突一面築壘掘壕以斷援賊初五日甯夏鎮總兵譚拔萃解開花大礮至相地築立礮臺探報山後有賊五六百騎來援比飭陶生林等率馬隊迎頭往剿甫出隘口與賊相遇鎗礮對施賊殊猛撲余虎恩令長矛手上前攢刺立斃悍賊十餘名陶生林夏辛酉率隊左右包抄賊騎却退官軍追逐五六里擒斬頗多忽前途騎賊千餘紛馳而至敗餘之賊遂竄入其羣一併狂奔而逸訊據生擒賊供先後兩起騎賊均怕夏第二子海古拉嚇令來達坂探援者不虞甫近達坂則爲官軍擊敗城中投出纜回報稱安夷盼援不到官軍鎖圍日逼羣議突圍而走劉錦棠傳令嚴防夜間列燧照耀光如晝初六日城東礮臺成是夜初鼓礮臺子牆成劉錦棠令參將侯名貴都司莊偉率弁丁護開花大礮三尊測準安放飭先轟賊中大礮臺次轟月城及城垛三礮連環疊轟勿任間斷踰時城中礮臺傾圮城身及月城已轟圯數口最後一子飛墮城中子藥房轟然一聲山摧地裂大風驟起火燄更張引燒賊儲藥

彈及所有開花子碎劄震撼賊中人馬碎裂遺齒堆積城賊開東門結團竄走東馳西突經官軍刀矛攢刺卒不得出劉錦棠傳令賊中裝束稍異者縛獻有賞於是大小頭目悉致麾下無一人一騎漏網者總計是役礮斃陣斃焚斃之賊二千數百餘名生擒一千二百餘名奪獲賊馬八百餘匹精利鎗礮軍械一千四百餘件大開花銅礮一尊官軍陣亡員弁勇丁五十二員名受傷者一百十六員名此三月初七日克達坂城夷回悉數擒斬之詳細情形也劉錦棠飭道員羅長祐等提訊生擒各賊計安集延人二百十三名南八城及吐魯番托克遜等處纏回八百六十五名哈喇沙爾土爾扈特種人六十九名本地回民一百六十四名內有安集延夷官大通哈一員其名爲愛伊德爾呼里大通哈者猶華言大總管也又安集延胖色提六員一愛什邁特一宜牙子邁特一毛喇阿邁特一他亦爾呼羅一愛里邁特一邁買地里胖色提者猶華言營官也又安集延玉子巴什三十六員南八城玉子巴什二

十二員玉子巴什猶華言哨官也其餘夷職尙多則華稱管理執事什長之員纏回與安集延語言相近劉錦棠令纏回通事傳話驛供得其崖畧據大通哈愛伊德爾呼里供願遣人報知怕夏縛送逆回白彥虎表歸順之誠繳回南八城地方再求恩宥各胖色提同聲代怕夏乞款劉錦棠諭令其歸向怕夏而陳一切愛伊德爾呼里等堅稱情願留軍中候怕夏回音以明心跡劉錦棠許其各遣親信數人告知怕夏及海古拉將大通哈等發交余虎恩暫行羈押將玉子巴什等解交留防烏魯木齊提督湯秀齋看守其就縛之南八城各回土爾扈特種人及土回等則均給以衣糧縱令各歸原部候官軍前進或爲內應或導引各酋目拔來歸各賊目於喪膽之餘懷不殺之德皆驚喜過望踴躍歡呼而去其前此潛赴烏垣求撫土回三百餘名給以牛種令就達坂舊城水城耕墾栽植俾復故業料量甫畢十一日潛師夜起十二日辰刻抵白楊河派遣員羅長祐甯夏鎮總兵譚拔萃肅州鎮總兵章洪勝巴

里坤鎮總兵席大成提督陶生林譚和義湯仁和率馬步六營分
由東南進吐魯番劉錦棠自率漢中鎮總兵譚上連提督黃萬鵬
張沛李隆寶戴宏勝陳廣發賀長發總兵董福祥副將胡登花參
將田九福崔偉畢大才禹益長馬正國禹中海游擊李金良等馬
步十四營由西南進直搗托克遜城行九十里未刻抵小草湖據
托克遜纏回報安曾聞達坂已失大小頭目無一倖脫驚懼不已
急圖逃竄逆首白彥虎嗾其死黨四出搶掠人畜焚燒村堡裹脅
纏回隨同奔竄泣求大軍速援並稱大軍所遣免死回目馳歸宣
布官軍威德回衆無復疑懼俱延頸以待官軍劉錦棠立飭將士
傳餐畢馬隊先發步隊繼之晡後齊抵近城十餘里間隙見前面
火光四起隱隱聞鎗礮聲知賊正圍攻莊堡也黃萬鵬卽率所部
馬隊急進忽馬步賊隊從路旁空莊衝出將官軍前後包圍勢殊
猖獗黃萬鵬崔偉畢大才禹益長禹中海李金良縱橫衝殺正鏖
戰間劉錦棠率馬步大隊馳至飭譚上連戴宏勝陳廣發賀長發

由左路董福祥田九福由右路橫截而出劉錦棠自率各隊由中路繼進比近城號鼓齊鳴殺聲振天賊衆驚潰舉火自焚存糧火藥棄城而逃官軍緊追鎗礮止刀矛接黃萬鵬等復從內殺出賊屍遍野餘賊紛竄天明瞭望敗賊約千餘騎向西而逃劉錦棠飭譚上連董福祥率所部馬步追之立復托克遜城撲熄餘火而本地纏回及所裹吐魯番哈密迪化陝甘各處回民約二萬餘齊跪馬前乞降劉錦棠受之令繳鎗械戰馬聽候遷移安插午刻譚上連黃萬鵬等回報追賊三十餘里斃賊三四百名生擒十九名奪戰馬數十匹鎗械數百件而還訊據生擒賊供海古拉白彥虎於十二日各帶隨身騎賊護其輜重及開花大礮洋鎗蒼黃西竄留悍賊二千餘並本地纏回及裹來吐魯番哈密各處回衆以綴官軍是役斃賊約二千餘名生擒百餘名奪獲戰馬數百匹槍械二千數百件受降二萬有奇而官軍陣亡者三十九員名受傷者五十三員名此三月十三日劉錦棠一軍克復托克遜城之詳細情

形也十五日劉錦棠接譚拔萃羅長祐等馳報奉派分路前進盡一日一夜之力十三日寅刻齊抵吐魯番適張曜徐占彪兩軍同日從東路馳至遂會克滿漢兩城安集延所置阿奇木馬人得詣前軍乞降回衆萬餘跪地求撫羅長祐等受之吐魯番全境蕩平竊維官軍自上年克古牧地堅巢連復烏魯木齊兩城軍威日盛安集延曾怕夏及陝西逆回白彥虎甘回馬人得等偷息南路官軍本可乘勝急進掃蕩而前以取破竹之勢因會攻瑪納斯南城稍滯戎機至十月以後大雪封山則履冰踰嶺勢有難行矣怕夏與白逆得乘其暇移達坂新城於兩山間高厚堅整迥殊常度築成怕夏以大通哈及大小各頭目踞爲堅巢又以托克遜爲由烏垣紅廟進南路總要隘口形勢最勝堅築兩城於此官軍不能飛越築成怕夏以次子海古拉率悍黨踞爲賊巢至吐魯番雖路通哈密然東距哈密尙千餘里東北踞巴里坤古城中段穆家地溝一帶七百餘里自東西鹽池以東又分遣賊黨穩踞其吐魯番舊

有滿漢兩城本尙完固海古拉又日役萬夫修築王府雄閣堅固足資踞守怕夏固自謂設險重疊有恃無恐也不料達坂遽爲官軍所破一人一騎不返官軍乘勝進攻托克遜風聲一播白彥虎卽棄吐魯番海古拉卽棄托克遜踉蹌而逃曾不停趾也以目前局勢言之南八城門戶洞開應卽整旆長驅以符緩進急戰之議惟怕夏自去冬派其大通哈等守達坂城海古拉守托克遜城白彥虎馬人得守吐魯番城原擬力抗官軍自居哈喇沙爾爲中權伸縮自如計茲海古拉白彥虎敗蹙西逃達坂破而大通哈就擒吐魯番棄而馬人得就撫爲怕夏計如知去逆效順縛白彥虎獻南八城固可不重煩兵力否則深溝高壘先據形勢圖老我師則官軍分道長驅集糧轉饋事不容已仍宜多方措置勞與費不能惜也官軍由吐魯番進哈喇沙爾爲程一千零二十里由托克遜進哈喇沙爾近一百八十里水草雖可就便而沿途產糧非多仍須裹糧而行一面由吐魯番節節轉饋而前姑免缺乏吐魯番產

糧雖廣時值新穀未升一時採運維艱無可指成數且官民駝隻疲乏已極又值歇廠屆期長途運脚無從雇備勢非仍由巴里坤哈密轉現糧用車馱灌輸吐魯番不可現飭哈密巴里坤兩局就儲存之糧分撥車馱一由巴里坤入穆家地溝取道七克騰木闢展以達吐魯番一由哈密取道瞭墩以達吐魯番且需協濟前敵各軍車馱由吐魯番轉托克遜是戰事利鈍雖在前茅而採運勞費仍責重後路也 飭劉錦棠速謀進取務出萬全咨張曜同赴前行兼籌糧運飭孫金彪徐占彪留吐魯番加意拊循毋失回民之望委候補道雷聲遠帶同隨營文員赴吐魯番設局辦理撫輯採運善後事宜委狄道州知州奎拔署理吐魯番同知委候選府經歷賀炳暈署吐魯番巡檢委補用典史陳壽椿署開展巡檢均刊給木質關防印記管理回務盤詰游匪以靖地方已據稟報成行矣此次大軍約期三道並進兩旬之間攻拔各要隘疊復各城池將領士卒持滿而發奸夷逆賊應弦而下斬擒以萬計受降以

數萬計是皆仰賴

聖謨廣運於萬里以外情狀洞矚無遺而諸軍咸荷

皇仁踴躍奮勉迅赴戎機其勞績實有未可掩仰者合無仰懇
天恩加之獎敘以勵前勞而策後效庶邊方歲事有期矣所有死
事各員均係攻堅奪隘血戰捐軀深堪憫惜應請旨飭部各照官
階從憂議卹以慰忠魂餘俟查明彙奏謹將官軍進規南路攻克
達坂城夷回擒斬無遺連克托克遜堅巢並分兵會克吐魯番滿
漢兩城詳細情形會同幫辦新疆軍務大臣伊犁將軍臣金順恭
摺馳陳伏乞

聖鑑訓示施行

光緒三年四月二十五日

嵩武軍蜀軍會克城隘詳細情形摺

竊官軍會克吐魯番大概情形臣已於三月二十九日專摺馳陳
先慰

聖渥茲據廣東陸路提督騎都尉世職加一雲騎尉世職霍欽巴

圖魯張曜記名提督雲騎尉世職哈西巴巴圖魯徐占彪續報張
曜與徐占彪得劉錦棠緘告擬暮春之初大舉南下維時張曜已
先派所部記名提督博奇巴圖魯孫金彪分統五營先紮東西兩
鹽池三月初一日率大隊由哈密繼進徐占彪率所部由巴里坤
古城中段穆家地溝搜山而進與孫金彪會師於鹽池議以七克
騰木地方堅壘爲吐魯番要隘賊所必爭初五日徐占彪飭提督
何玉超宋賢聲總兵黃祖福率馬步三營暗度戈壁初六夜抵張
家卡賊壘夜靜更鼓稀少似尙不知官軍已至也何玉超等選派
勇卒數十由北隅攀登周厯而呼號鼓齊發賊攪衣起倉卒不知
所爲官軍乘勢啟門一擁而入遂奪卡壘據之初七日何玉超等
率隊進攻七克騰木初八日徐占彪察看地勢分軍三路進攻同
日孫金彪率隊齊至四面合攻連施鎗礮兩軍愈戰愈猛賊不能
支奪門逃竄有紅衣賊目一名領羣賊出戰兇悍異常徐占彪飭
礮手指擊應聲而倒羣賊向西路狂奔徐占彪孫金彪督隊躡追

沿途斃賊約百數十名生擒五名奪獲鎗械百餘件戰馬二十餘匹初九日乘勝進攻闢展甫至城邊賊望風而遁徐占彪孫金彪督隊躡斃賊數百生擒三十餘名孫金彪所部陣擒安集延賊二十五名內頭目一名裝束稍異供名才米邪斯係安集延曾派守闢展城者訊畢斬之遂復闢展城是役計奪獲鎗械百餘件健馬數十匹此三月初六初八初九等日攻克張家卡七克騰木各城堡並會克闢展城之實在情形也孫金彪等會議賊或調集醜類節節準備則攻取爲難不如出其不意迅速掩擊易於藏事十一日各率所部分道急進徐占彪率所部蜀軍由左孫金彪率所部嵩武軍由右十二日抵連木沁城賊聞官軍驟至紛紛出竄孫金彪督隊疾馳斬賊數十名立將連木沁城克復查該處係新築之城城中纏回甚多跪地乞撫孫金彪受之並將所獲牛馬發給撫回張貼告示令其安業仍督隊抵勝金台該處亦有新築土城踞賊數百背城迎拒孫金彪飭步隊與賊挑戰飭游擊林秀全

等率馬隊繞後抄擊賊陣遂亂四散狂奔立將勝金台新城攻拔
追斬騎賊二百餘名生擒數十名內有安集延兵二十餘名奪獲
鎗械數十件是日辰刻徐占彪督隊抵魯克沁城賊見官軍至卽
列隊城邊拒戰我軍以馬隊衝之賊亦以馬隊抵禦我軍步隊以
長矛繼進騎賊卻退由城北折轉城西向吐魯番竄去城中守賊
亦奪門西遁兩軍仍會合於哈拉和卓城東城中守賊倉皇出走
飭馬隊躡追敗之收隊入城安撫本地回民十三日丑刻兩軍疾
趨行距吐魯番十餘里地方探報賊已傾巢出竄劉錦棠已由達
坂派馬步各營星夜由北面馳至三軍會同收復吐魯番滿漢兩
城安集延所立阿奇木僞官馬人得降於軍前本地纏回萬餘羅
拜乞命劉錦棠所派道員羅長祐孫金彪徐占彪受之令呈繳馬
械各安生業查吐魯番漢城本纏回所居滿城爲安集延所踞逆
豎海古拉修建僞府壯闊逾常其軍械軍糧萃聚於此事後藉獲
賊糧數十石賊儲子藥約三十餘萬斤此三月十二十三等日嵩

武軍蜀軍連克魯克沁城連木沁台勝金臺哈拉和卓城會同收復吐魯番滿漢兩城之實在情形也竊維吐魯番舊本車師王庭形勢與古城並重大軍由東道進規南八城必間途於此回亂以來地爲安夷所踞防守益嚴安酋怕夏自占踞吐魯番征斂繁重虐使其民纏回苦之久矣顧爲其詐力所屈欲自拔而不能上年擬下兵南疆當三路同時並進使賊備多力分不至爲所牽綴而張曜徐占彪兩軍進取之期合各以防所遠近爲先後尤必由劉錦棠酌定師期庶幾程途適均不至彼此參差以愆期致貽後悔而哈密抵吐魯番爲程千一百餘里巴古中間取道穆家地溝通車大道以抵吐魯番亦七百餘里尙不若由烏魯木齊取道達坂城抵吐魯番僅只四百餘里之較捷也茲張曜徐占彪一聞劉錦棠進兵有期卽各自防所絡繹奔赴三月初五日以後次第攻克城卡過赴戎機卒能於十三日與劉錦棠別部同時會克吐魯番滿漢兩城以戰事言似未若達坂托克遜之神奇而破敵之果

赴機之速實_{從速}始願所不及也非將士踴躍用命其效固不臻此應懇

天恩先加甄叙以照激勸所有嵩武軍連克城隘並會師克復吐魯番滿漢兩城詳細情形謹會同幫辦新疆軍務大臣伊犁將軍

金順恭摺馳陳伏乞

聖鑒訓示施行

光緒三年四月二十五日

逆酋怕夏仰藥自斃摺

竊達坂大捷安集延兵頭大通哈胖色提等概行就縛自請公同上書酋長怕夏擒陝西逆回白彥虎解赴軍前獻還南八城再懇恩宥劉錦棠許之令其各選親信數人同所遣入城纏回前去去後迄未得其回報茲據劉錦棠稟五月十四日有哈密回王邁哈默特從前疊次所遣探迎其母之回目和加木牙斯買賣色德可又阿布都買賣提繞攸買賣提又蘇卜爾蓋秋如可等六名帶同逃出難回到托克遜投營並持回哈密大臣路票呈驗訴稱我們

前後奉親王三次派赴南路訪尋老福晉一入吐魯番境均被安集延卡兵盤獲送托克遜見怕夏怕夏卽將我們監押嗣隨怕夏到庫爾勒地方仍照前監押上年聽得官軍破古牧地得了紅廟子安集延人南八城人都害怕今年官軍破達坂城安集延人盡死其頭目又被生擒纏頭九百餘人蒙恩釋放怕夏殺過數十人監押一半餘俱潛逃回家各城纏回畏官軍之威感官軍之德愈恨怕夏不服其約束怕夏知人心已去日夜憂泣四月上半月服毒藥死了其子海古拉將屍沈水中三日取出用香牛皮包裹噉其死黨昇行昨聞庫車回子已將海古拉拏去原留庫爾勒之安集延大通哈胖色堤一聞此信卽將庫爾勒之糧倉軍火財物交白彥虎接管星夜馳赴庫車我等繞南而海沿子逃歸等情據張曜牘開吐魯番纏回陸續自喀喇沙爾逃歸者僉供四月初十內外怕夏在庫爾勒飲藥自斃怕夏之子率黨夥向西竄去白彥虎移蹕開都河西岸與劉錦棠稟報相同是逆酋怕夏畏懼自盡確

整可據惟逆豎海古拉經庫車纏回拏去如何下落尙無確報頃復據張曜轉據魯克沁回目邁引報四月二十三日派薩吾提等五人前赴羅布淖偵探賊蹤見羅布淖伯克據稱老怕夏在庫勒死了小怕夏護屍西走將庫勒事務交白彥虎並派有阿克木管理小怕夏走到庫車有托胡的夏帶領庫車阿克蘇薩牙三處纏回頭將小怕夏及和闐呢牙斯阿奇木伯克兩人殺了並將安集延人殺散其留在庫勒之阿克木得信即將銀錢交付白彥虎說庫車三處人現與小怕夏打仗我去一看就來想是不回來了查所供之小怕夏卽指海古拉庫勒卽庫爾勒也薩吾提等並言羅布淖伯克盼官軍早到並開其子孫三品伯克三名五品伯克三名七品伯克三名花名清單呈閱連旬以來疊據各營偵報大略相同是逆子海古拉經庫車阿克蘇等纏回截殺亦確鑿可據竊維安集延曾怕夏本浩罕四部之一浩罕旣亡怕夏乘中原多故遠畧未遑竟敢盜踞南疆招納潰兵叛弁盡取回部四千餘里據

而有之與北路客回同惡相濟迨

天戈西指不卽束身歸命遁歸故巢竟敢勾結漏誅逆回白彥虎肆其披猖公然抗拒及古牧大創烏垣紅廟子疊克猶復堅據達坂托克遜吐魯番各城隘遇大兵南下之鋒爲三窟深藏之計諸將士肅申

天討甫及旬餘各城隘一律掃除而達坂之克無一人一騎得還老賊尤爲膽落比逆屬大通哈愛伊德爾呼里等勸其縛送白彥虎獻回南入城自贖而怕夏聞敗震懼不能制白彥虎又平時恃其詐力虐遇纏回攫其資財掠其男女靡惡不爲纏回怨毒已深至是羣思報復怕夏有所聞憂惶無措決計自斃希免顯戮而逆子昇屍西竄中途復經庫車阿克蘇等纏回截殺是誠積惡滅身天網無漏也查怕夏自稱畢調勒特汗有子四人長哎哥次名哎都魯股魯急呼則海古拉第三子曾充阿克蘇伯克四子曾在吐魯番均不知名其留守本境之長子哎哥則尤非怕夏所愛也其

留守喀什噶爾者聞係何姓本前換防武員不知何時叛投安集延以其女改名色哩嗎罕妻怕夏聞現尙帶叛兵二千餘此外除安集延兵數千又有漢人五六千纏回萬餘人在彼耕種經商當兵均雍辯回裝以自別據各路偵報所陳如此謹參核而識其大略尙未知確否也安集延在浩罕各部中素稱强悍敢爲大言道光初張格爾爲變卽恃其部衆爲親兵與官軍抗部人以經商致富與泰西諸國通亦頗習其製造怕夏性暴而貪竊踞南疆八城後狡焉思敗不僅夜郎自大已也此次屢經大創自取滅亡回部內訌已成瓦解之勢計八城中除喀什噶爾尙須重煩兵力此外師行所至當無敢再抗顏行者劉錦棠張曜軍律嚴明盡心撫輯從賊中逃歸者隨時安集各處之被賊裹脅者隨時資遣計送歸烏魯木齊者二千七八百名口送歸哈密者二千五六百名口皆給以牛種賑糧俾得各安生業遠近聞風景附不約而同察看情形南疆戡定有期差堪仰慰

聖厯所有夷酋自斃逆子復經截殺緣由謹據實陳明伏乞

聖鑒訓示施行

光緒三年六月十六日

統籌全局摺

竊_臣於五月二十四日欽奉

諭旨關外軍情順利吐魯番等處收復後南八城門戶洞開自當乘勝底定回疆殲除醜類以竟全功惟計貴出於萬全事必要諸可久吐魯番固爲南路要隘此外各城如阿克蘇等處尙有可據之形勢否回曾報知怕夏縛送白彥虎繳回南八城之說是否可恃伊犁變亂多年前此未遑兼顧此次如能通盤籌畫一氣呵成於大局方爲有裨該大臣親總師千自以滅此朝食爲念而如何進取如何布置諒早胸有成竹爲朝廷紓西顧之憂其卽統籌全局直抒所見以慰厯念等因欽此跪誦之餘具仰我

皇上眷顧西服

聖慮深遠於保大之中厯取邊之略欽佩何言竊維立國有疆古

今通義規模存乎建置而建置因乎形勢必合時與地通籌之乃能權其輕重而建置始得其宜伊古以來中國邊患西北恒劇於東南蓋東南以大海爲界形格勢禁尙易爲功西北則廣莫無垠專恃兵力爲強弱兵少固敗戎心兵多又耗國用以言防無天險可限戎馬之足以言戰無舟楫可省轉饋之煩非若東南之險阻可憑集事較易也周秦至今惟漢唐爲得中策及其衰也舉邊要而捐之國勢遂益以不振往代陳蹟可覆按矣顧祖禹於地學最稱淹貫其論方輿形勢視列朝建都之地爲重輕我

朝定鼎燕都蒙部環衛北方百數十年無烽燧之警不特前代所謂九邊皆成腹地卽由科布多烏里雅蘇台以達張家口亦皆分屯列戍斥堠遙通而後

畿甸宴然蓋

祖宗朝創平準部兼定回部開新疆立軍府之所貽也是故重新疆者所以保蒙古保蒙古者所以衛

京師西北臂指相聯形勢完整自無隙可乘若新疆不固則蒙部不安匪特陝甘山西各邊時虞侵軼防不勝防卽直北關山亦將無晏眠之日而況今之與昔事勢攸殊俄人括境日廣由西而東萬餘里與我北境相連僅中段有蒙部爲之遮闔徒薪宜遠曲突宜先尤不可不預爲綢繆者也

高宗平定新疆拓地周二萬里一時帷幄諸臣不能無耗中事西之疑

聖意堅定不搖者推舊戍之瘠土置新定之腴區邊軍仍舊餉不外加疆宇益增鞏固可爲長久計耳方今北路已復烏魯木齊全境祇伊犁尙未收回南路已復吐魯番全境祇白彥虎率其餘黨偷息開都河西岸喀什噶爾尙有叛弁逃軍終煩兵力此外各城則方去虎口如投慈母之懷自無更抗顏行者新秋採運足供餘糧栖畝鼓行而西宣布

朝廷威德且勦且撫無難挈舊有之疆宇還隸職方此外如安集

延布魯特諸部落則等諸邱索之外聽其翔泳故區可矣英人爲安集延說者慮俄之蠶食其地於英有所不利俄方爭土耳其與英相持我收復舊疆兵以義動設有意外爭辯在我仗義執言亦決無所撓屈至新疆全境向稱水草豐饒牲畜充牣者北路除伊犁外奇臺古城濟木薩至烏魯木齊昌吉綏來等處回亂以來漢回死喪流亡地皆荒蕪近惟奇台古城濟木薩商民散勇士著民人聚集開墾收穫甚饒官軍高價收取足省運腳餘如經理得宜地方始有復元之望南路各處以吐魯番爲腴區八城除喀喇沙爾所屬地多磽瘠餘雖廣衍不及北路而饒沃或過之矣官軍已復烏魯木齊吐魯番雖有駐軍之所而所得腴地尙不及三分之一若全境收復經畫得人軍食可就地採運餉需可就近取資不至如前此之拮据憂煩張皇靡措也區區愚忱實因地不可棄兵不可停而餉事匪絕計非速復腴疆無從著手局勢所迫未敢玩愒相將至省費節勞爲新疆畫久安長治之策紓

朝廷西顧之憂則設行省改郡縣事有不容已者合無仰懇

天恩飭戶兵兩部速將咸豐初年陝甘新疆報銷卷冊各全分及
新疆額徵俸薪餉需兵制各卷宗由驛發交肅州俾得稽考舊
章按照時勢斟酌損益以便從長計議奏請定奪茲因欽奉
諭旨統籌全局直抒所見謹據愚見所及披瀝密陳伏乞

聖鑒訓示施行

官軍尅期進剿應防賊蹤紛竄摺

竊 欽奉光緒三年七月初二日

上諭左宗棠擬俟新秋採運足供鼓行而西刻下至屆秋令著卽
檄飭各軍尅日進兵節節掃蕩白彥虎素稱狡猾務當設法就地
擒斬毋任再行遠竄等因欽此見據總理行營營務處總統馬步
各軍西甯道劉錦棠稟稱托克遜各城攻克後擬乘勝進規南路
八城祇因吐魯番新糧收穫需時哈密巴里坤車馱轉運陳糧難
於聚集正直蛇變歇廠轉運艱難無從設法又地本火州舊壤夏

令炎威灼人未可急進擬俟八月初旬涼風漸至各營糧運稍資
裹帶當卽獎帥師徒鼓行而西惟近據降回供稱逆回白彥虎一
股分踞庫爾勒附近一帶議俟官軍進逼卽翻山北竄伊犁綏來
等處請卽咨行北路軍營加意偵探截擊務遏竄蹤臣維安集延
逆酋怕夏父子伏誅餘孽自無棄巢遠竄之事惟白逆一股分踞
庫爾勒附近一帶極爲散漫該逆悍驚不足狡猾有餘見雖偷息
開都河西岸一聞官軍進逼其避兵鼠竄自在意中察看賊之竄
路有三一西竄庫車阿克蘇一帶一迤西而北竄伊犁境內一東
南竄羅布淖爾取道吐魯番界覓荒僻無人之境東竄敦煌以取
通海藏之路就此三路而言如西竄庫車阿克蘇是本官軍追賊
必出之途無庸別籌布置如旁竄羅布淖爾一帶地僻人稀逆衆
盤旋山澤間難以善脫狡謀或不出此惟翻山而竄伊犁邊界以
出昌吉綏來則地勢平衍道路紛歧難於遮截非預爲擇要堵剿
不可也臣已密飭劉錦棠張曜於進兵時就近攔截遏賊奔衝免

分兵力賊果西竄自當蹠蹤追剿期於盡殺乃止如其回竄而南張曜所部及留後各營當相機截擊巴里坤哈密安西等處防管節節布置尙可無虞所宜預爲籌策者北竄一著耳窮寇亡命狂奔急何能擇苟恃距賊過遠防範稍疏誠慮倉猝聞警將貽意外之患傳曰不備不虞不可以師此所宜慎也除飛咨幫辦軍務伊犁將軍金順暨駐精河之廣州副都統福珠哩嚴飭所部遠發偵探加意預防一遇回逆股匪竄近卽行截剿毋使一名漏網并飛咨署烏魯木齊都統英翰檄飭統領卓勝軍金運昌加意偵探防剿毋稍疏忽外相應請

旨飭下額勒和布保英英廉金順英翰一體加意嚴防以昭周密而竟全功所有官軍尅期西進並防賊紛竄情形恭摺馳陳伏乞聖鑒訓示施行

官軍連復喀喇沙爾庫車進規阿克蘇摺

竊。前奏奉

諭旨左宗棠擬俟新秋採運足供鼓行而西刻下已屆新秋著卽
檄飭各軍尅日進兵節節掃蕩比卽恭錄行知嗣據總理行營營
務處總統馬步各軍三品卿銜布政使銜甘肅西甯道法福靈阿
巴圖魯劉錦棠報稱七月十七日先派提督湯仁和率隊由托克
遜進紮蘇巴什阿哈布拉兩處八月初一日續派總兵董福祥張
俊等率步隊三營由阿哈布拉桑樹園庫木什榆樹溝星星子烏
沙塔拉一帶前進安紮哨壘至曲惠安營又派提督張春發率隊
由伊拉湖小道進至曲惠與張俊會隊均曳負薪草開濬泉井按
程預備以待大隊續至二十一日劉錦棠分飭各步隊由大路進
自率馬隊各營由小路進二十六日齊抵曲惠詢知十八日有騎
賊百餘前來窺探瞥見官軍隊伍卽返馬狂奔二十七日派提督
余虎恩黃萬鵬等率馬步十四營取道烏沙塔拉傍博斯騰淖爾
西行出庫爾勒之背爲奇兵二十九日劉錦棠率隊由大路向開
都河進發爲正兵開都河源自天山之麓匯而南趨貫庫爾勒喀

喇沙爾之中下流注於博斯騰淖爾古所謂渤澤者也白逆自喀喇沙爾過開都河西岸卽壅開都河水以阻官軍漫流泥濘濶可百餘里劉錦棠師至遣騎試探深者減頂淺者亦及馬背次日舍淖路望離地逕行六七十里一溪前橫深亦丈許傳令將士晷水逕過仍向巖地紆折而前約百二十里方達開都河東岸飭馬步五營搭造浮橋堵塞上流就原來離地掘修車道九月初一日劉錦棠親入喀喇沙爾城中巡視大城水深數尺官署民舍蕩然無存所有纏回均被白逆迫脅隨行間有存者隱匿山谷不敢出也劉錦棠諭和碩特台吉札希德勒克速遷所管蒙民數百戶前來以實後路初一日率蒙民嚮導探河身淺處輕騎減裝亂流而渡沿途民舍均已燒燬亦無居民初三日過哈爾哈阿滿溝馬隊在前突有騎賊百餘斜掠而過騎兵縱馬追斬十餘騎生擒兩賊驗視皆安夷裝束訊之則陝回也據供白逆於秋糧甫獲卽迫纏頭悉數搬糧入庫車聞官軍將至迫其隨行回性怯弱不敢有違此

來爲探官軍進止訊畢斬之是日余虎恩等亦從間道馳至此入庫爾勒則空城一座間無人煙而行糧已罄後路轉運車駝未至軍無見糧劉錦棠令軍士覓掘窖糧得數十萬觔一而飛輓後路轉運接濟一面派員招輯難回此九月初一初三等日官軍收復喀喇沙爾庫爾勒等城安撫難民之實在情形也劉錦棠偵知白逆因策達雅爾洋薩爾兩處纏回及烏魯木齊吐魯番各難回尙有未經盡徙者復至洋薩爾迫脅隨行乃於各營步隊挑選健卒一千五百名馬隊挑選精騎一千名作爲頭隊親率以行令道員羅長祐管帶後隊各營及輜重繼進初十日行百七十里駐庫爾楚次日行百六十里駐策達雅爾探報白逆於日內盡驅洋薩爾纏回同回布告爾卽令頭隊炊食二更啟行八十里至洋薩爾但見各村堡火光燭天杳無人聲知該逆臨行放火傳令後隊撲救仍率頭隊卽進行一百里至布告爾日已交午報稱回莊之前賊騎千餘排列黃萬鵬等率馬隊進擊賊欺其少猛撲前來譚拔萃

等率步隊超前接戰騎賊敗卻我軍乘勢追擊陣斬百餘名生擒
十餘名至莊西十餘里收隊蓋是日已行二百里矣訊據擒賊供
稱白逆家口已於前十日過此並有悍賊二千護之此間與洋薩
爾纏頭及烏魯木齊哈密吐魯番各城裹來漢回喀喇沙爾裹來
蒙民均經白逆派令頭目驅向庫車此起係殿後之賊等語初十
日五更頭隊行四十里瞥見前面騎步數萬以測微鏡瞭之見持
械賊不過千餘其餘皆扶老攜幼驅車牽牛雜遝攢集知爲賊脅
難民劉錦棠傳令手執軍械者斬餘均不問須臾號鼓齊鳴馬步
並進賊敗委難民而去甫數里復列隊挺矛以待官軍奮衝殺
賊乃狂奔是日駐營阿爾巴台劉錦棠派陶生林護難民歸布告
爾洋薩爾兩處權爲安插十一日馳抵托和奈地方令數十騎偵
視回莊有無伏賊遇數賊奪門出擒訊始知白逆於是日巡向庫
車竄走莊中蒙回未被脅去者尙萬餘均伏地號呼劉錦棠撫諭
安居如常勿庸驚怖是夜四鼓拔隊行三十里距庫車大城不遠

聞鎗礮聲官軍急進見纏回數萬散布郊原訊知皆庫車之不願
隨賊西行者賊見官軍至方集隊抗拒劉錦棠令黃萬鵬崔偉畢
大才禹中海禹益長李金良馬殿林率旌善馬隊由右譚萃拔賀
長發戴宏勝率步隊繼之章洪勝方友升夏辛酉張宗本率馬隊
由左張俊胡登花石蘊玉率步隊繼之劉錦棠自率馬隊居中調
運羅長祐率後隊馬步繼進騎賊四五千分兩路來拒官軍擊之
斃賊已多賊仍死鬪譚拔萃等步隊繼進正鏖戰間羅長祐後隊
馬步大至橫躍入陣賊始大潰官軍乘勝蹙之追殺四十里沿途
賊屍駢列約計陣斃之賊不止千數也自此西行卽度戈壁非攜
水不可而庫車纏回急宜安撫遂收隊回庫車撫諭回民令各安
堵如故訊擒賊供本日陣前轟傷賊目卽賊中總領馬由布也白
逆聞官軍連到先遣人護眷口西行已爲殿後並嚇悍黨迫脅回
衆隨行比官軍奄至回衆不願前進諸賊正開鎗轟逼忽官軍大
至悍黨乃舍所脅回衆以拒官軍不料一敗至此問白逆裹回衆

隨行何意擒賊供聞賊中計議一使官軍無所資藉難以遠追一欲多裹纏回至喀什噶爾獻之新伯夏伯克胡里爲結納計訊畢斬之此九月十二日克復庫車城安撫回衆實在情形也十三日劉錦棠拔隊啟行馳百八十里次日抵和色爾發報後仍緊追拜城以指阿克蘇將窮賊所往盡力追殺其張曜一軍於九月初旬次第進發張曜料理善後畢中旬亦卽啟行以喀喇沙爾本南路入城之一庫爾勒舊號腴區蒙回被賊驅迫非其本懷應設撫輯善後局籌給賑種待以來歸課以耕牧一面平治道路修造渡船安設驛站以通商旅而速郵傳現委同知銜留川補用知縣黃繼裕分省補用巡檢顏廷奎作爲喀庫善後撫輯局員攜銀前往妥爲經理其庫車至阿克蘇一帶雖咨請張曜於繼進之便隨時規畫而經理必有專員已飭古城探運局布政使銜道員陶兆熊馳赴劉錦棠軍前聽候差委將來大軍前進局勢日寬克一城卽須設一局委員尙宜預爲遴派庶資差遣也此次劉錦棠率所部

馬步追勦逆回擒斬悍賊雖不過千數百名而自庫爾勒啟行踰蹤奮擊六日夜馳九百里收復喀喇沙爾庫車兩城其餘城堡回莊無數現指阿克蘇拔出被裹回衆以十萬計據報庫車一帶糧料充足用價採買較吐魯番尙易不但可省轉運勞費並免遲悞戎機尤爲幸事將士感沐

皇仁踴躍前驅不辭艱瘁其勞烈實有未可掩抑者應否

恩允存記彙獎出自

聖裁其力戰陣亡之各員應請

旨飭部各照官階從優議卹以慰忠魂謹將追勦獲勝連復喀喇沙爾庫車各城現籌進取並籌布後路情形會同幫辦新疆軍務大臣伊犁將軍 金順恭摺馳陳伏乞

聖鑒訓示施行

